



18442


18442


I

Mag. St. Dr.

P







1.
Petri
0703

IURA
MUNICIPALIA
TERRARUM PRUSSIAE,
ET LEGES AD EAS TERRAS
PRIVATIM PERTINENTES.



THORUNII
excudebat AUGUSTINUS FERBERUS
ANNO DOMINI

M. DC. XII.

Bartholo Meieris.

BIBLIOTHECA
VNIV. IAGELL.
CRACOVIENSIS.

18442.I

fr
in

te
v
ib
in
gi
Et
pr
m
ju
st
Fr
se
Et

PRIVILEGIUM CULMENSE.

FRATER EBER-
HARDUS dictus de SEYNE, Præceptor
Domus Sanctæ Mariæ Theutonico-
rum per Alemaniam, & vices gerens Ma-
gistri Generalis per Livoniam & Pruf-
siam, Universis Christi fidelibus præsentem paginam
inspecturis, orationes in Domino Jesu Christo.

Noverit Universitas vestra, quòd Nos, cum ad par-
tes Prussiae pro negociis plurimis venissemus promo-
vendis, inter alia, quæ nobis diffinienda occurrerunt,
ibidem negocia, Cives Culmenæ ac Thorunenæ turbatos
invenimus pro eorum Privilegio, quondam eis à Ma-
gistro nostro bonæ memoriæ Fratre HERMANNO di-
cto de SALCZA, & Fratre HERMANNO BALKONE,
primo ejusdem Terræ Commendatore, donato, & post-
modum per incendium Civitatis Culmensis amisso, Cu-
jus rei veritatem à Fratribus nostris ac aliis viris hone-
stis Nos plenius cognoscentes, de communi consilio
Fratrum nostrorum ibidem existentium, pariter & con-
sensu, dictos Cives lætificantes, Privilegium prædi-
ctum ipsis restaurandum duximus, in hunc modum.

2

FRATER HERMANNUS

Domus Hospitalis Sanctæ Mariæ Theutonicorum Jherosol. Magister, & FRATER HERMANNUS BALKO, ejusdem Ordinis in Prussia Provisor, nec non totus ejusdem Domus Conventus, universis Christi fidelibus, hanc paginam inspecturis, Salutem in vero Salutari.

QUANTO plura quantoq; majora Culmen Terræ, ac præcipuè Civitatum nostrarum incolæ, Culmensis scilicet & Thoruñ, tum pro Christianitatis defensione, tum pro Domus nostræ promotione, discrimina sustinebant, tantò ardentius atq; efficacius in omnibus, quibus cum Justitia possumus, eis adesse volumus & debemus. Hinc est, quòd eisdem Civitatibus hanc indulgimus perpetualiter libertatem, ut earum Cives eligant sibi in iisdem Civitatibus singulos Judices annuatim, qui Domui nostræ & Communitati Civitatum competant earundem: Eisdemq; Judicibus celsimus perpetualiter de parte tertia mulctarum Judicialium, pro culpis majoribus pensatarum, pœnam minorum excessuum, quæ Quotidiana dicitur, videlicet XII. nummos, & infra eis totaliter concedendo, Ita ut quicquid de talibus Judex infra tribunal indulserit, de quatuor solidis videlicet & infra, id etiam ex parte Domus nostræ sit indulgum. Veruntamen de majoribus culpis, ut sunt homicidia, sanguinis effusio & his similia, Judex absq; Fratrum nostrorum assensu nihil remittat, Nos etiam partes illas, quæ Nos contigerint, in eisdem Judiciis vendere vel infeodare cuiquam non debemus.

IGitur

Igitur Civitati Culmen dedimus ad prata, pascua,
 & alios usus communes, à terminis cujusdam Villæ, quæ
 list appellatur, per descensum Wislæ, usq; ad terminos
 cujusdam Lacus, qui dicitur Rensehe, & de ipso Lacu
 ascendendo usq; ad Villam, quæ Rude vocatur, & jux-
 ta terminos ejusdem Villæ usq; ad aliam Villam Luna-
 we dictam, & sic directè ad viam, quæ ducit ad Insu-
 lam S. Mariæ, per viam verò directè usq; ad terminos
 cujusdam Villæ, quæ Grobene dicitur, & sic ulterius
 ad Vallem, quæ Browina nuncupatur. Nec hoc ta-
 cendum est, quòd liberum erit piscari sæpedictis Civi-
 bus in prædicto Lacu, qui dicitur Rensehe, sicut & no-
 bis. Præterea supradicta Bona tam in sylvis, quàm in
 pratis & agris, cum omni utilitate, quam Domus nostra
 percipere posset exinde, dicti Cives in perpetuum libe-
 re possidebunt. Flumen verò Wislam à Villa quadam,
 quæ dicitur Topulna, per descensum, usq; ad Lacum,
 qui Rensehe vocatur, cum omni utilitate, exceptis In-
 sulis & Castoribus, ad communes usus piscandi, prædi-
 ctis Civibus & peregrinis duximus assignandum. Civi-
 tati verò Thorun idem Flumen in longitudine ac termi-
 nis Dñi Cujaviensis Episcopi ad unum milliare descen-
 dendo, & in terra in latitudine circa Wislam circun-
 quaq; per dimidium milliare, cum omni utilitate, exce-
 ptis Insulis & Castoribus, ad communes usus Civium
 & peregrinorum duximus assignandum.

Statuimus autem, in eisdem Civitatibus Jura Meg-
 deburgensia in omnibus sententiis in perpetuum obser-
 vari, hoc indulto, ut cum Reus aliquis Megdeburchi in
 sexaginta solidis puniri debeat, hic in triginta solidis

4

Culmenē monetæ multeretur, Eodem modo in culpis aliis proportionaliter observando. Si verò aliquis dubietatis scrupulus de Jure judiciario, vel de Juris judiciarii sententiis Civitatibus emerferit, in eisdem idem Articulus à Culmensis Civitatis Consulibus requiratur, Quia eandem Civitatem Capitaalem esse volumus, ac digniorem inter alias jam constructas, & si quæ adhuc infra Wislam, Ozzam & Driwanzam constructentur. Dicti verò Cives ac feodales earundem Civitatum de communi consensu cesserunt de Jure, quod in Wisla super Navigio hæctenus habuerunt, Ipsum cum omni utilitate Domui nostræ liberè resignando, Hac tamen conditione præmissa, quòd Nos dictum Navigium pro Summa, quanta volumus & possumus, locare seu vendere debeamus hominibus, quibus voluerimus, qui in Civitatibus, Culmensi videlicet & Thorunensi, residentes Justiciam exhibeant unicuiq; & accipiant coram Civitatum Judicibus earundem, & naulum usq; ad præsens consuetum debeamus absq; augmento aliquo deinceps observare. Hyemali verò tempore, cum fuerit glacies, Fratres de consilio Judicum & Consulium earundem Civitatum naulum statuunt, ut eorum discretioni videbitur expedire. Statuimus etiam, ut omnes Clerici & viri religiosi, de quacunq; religione extiterint, absq; omni naulo perpetualiter cum rebus eorum, quas secum habuerint, traducantur. Quòd si quis ex ductoribus navium ex prædictis aliquem traducere ausu temerario contradixerit, leviori culpæ subiaceat, quali scilicet quatuor solidorum pœna consuevit asseribi.

PRomissimus etiam, ut in eisdem Civitatibus nullas

5
has domos emere debeamus; Si verò aliquis domum aut
aream suam Domui nostræ contulerit intuitu pietatis,
et ad alios usus construere non debeamus, nisi ad quos
aliquis ex civibus construit domum suam, & eadem
exinde jura & consuetudines observare, quæ & quas
alii de suis domibus observabunt. In his tamen Con-
ditionibus Munitiones nostras, quas in eisdem Civi-
tatis jam habemus, volumus non includi.

PARochiam in Culmæ dotavimus quatuor mansis
juxta Civitatem, & aliis quadraginta, ubi eisdem fue-
rint demonstrati. Parochiam verò Thorunensem
dotavimus quatuor mansis juxta Civitatem, & aliis
quadraginta, ubi ei fuerint assignati. Et in eisdem
Ecclesiis Jus Patronatus nostræ Domui retinemus, eis in
Plebanis idoneis provaturi. Cæterum si aliqua Paro-
chia in Villis supradictorum Civium fabricata fuerint,
si cum Villarum singulæ earundem octuaginta mansos
vel amplius habuerint, promissimus Parochiarum quam-
libet prædictarum quatuor mansis de nostra speciali par-
te dotare, Et Jus Patronatus habebimus perpetuò indo-
tatis, eis etiam in idoneis Sacerdotibus provaturi.

AD hæc statuimus, ut si qua fortè quæstio contra
aliquem de Bonis suis orta fuerit, si possessor vicinos ac
alios conterraneos suos, quibus notum fuerit, rem ta-
liter se habere, & testimonium justæ possessionis ha-
buerit, potius debeat obtinere Bona illa, quam is, qui
eum impetit, ab ipso eadem Bona alienet. Absol-
vimus autem prædictos Cives ab omnibus Collectis in-
justis & hospitationibus coactivis alijsq; exactionibus
inde-

6

indebitis, ad omnia Bona eis attinentia hanc gratiam extendentes. Porro eisdem Civibus nostris vendidimus Bona sua, quæ à Domo nostra habere noscuntur ad hæreditatem flammingicalem, ipsis & eorum hæredibus utriusq; sexus, ea cum omnibus proventibus in perpetuum liberè possidenda, salvis tamen his, quæ Domui nostræ per totam Terram duximus retinenda. Retinemus enim Domui nostræ in Bonis eorum omnes lacus, castores, venas salis, auri argentiq; fodinas, & omne genus metalli, præter ferrum, Ita ut tamen inventor auri, siue is, in cuius Bonis inventum fuerit, idem Jus habeat, quod in Terra Ducis Slesia, in huiusmodi, talibusest concessum. Inventor autem argenti, siue is, in cuius agris inventum fuerit, Jus Fribergense in huiusmodi inventione perpetualiter obtinebit. Quòd si Lacus aliquis ad tres tractus sufficiens agris alicujus prædictorum Civium adjunctus fuerit, si is, cuius agri sunt, eundem lacum loco agrorum acceptare voluerit, in sua ponimus optione. Si verò major fuerit, quocunq; instrumento in eo piscari voluerit, ad commodum duntaxat mensæ suæ, præter rete, quod Newod dicitur, habeat liberam facultatem. Item si rivus aliquis agros alicujus Civis attigerit, ei, cuius agri fuerint, solummodò molendinum ædificare liceat in eodem: Si verò idem fluvius aptus fuerit pluribus molendinis, Domus nostra in construendis eisdem aliis tertiam partem priorum sumptuum faciat, & percipiat perpetualiter tertiam partem usuum de constructis. Volumus etiam, ut de qualibet fera, quam ipsi vel eorum homines ceperint, exceptis ursis, porcis, & capreolis, armum dextrum Domui nostræ reddere teneantur.

Sane

Sanè quod de Lacubus, molendinis seu feris posuimus,
ad illos duntaxat Cives extendimus, qui à Domo no-
stra, sicut supradictum est, hæreditati esse noscuntur.
Ipsis etiam hanc contulimus libertatem, ut Bona sua,
quæ à Domo nostra possident, vendendi talibus sanè,
qui Terræ ac Domui nostræ benè competant, habeant
facultatem, ita ut hi, qui ea emerint, de manu Fra-
trum suscipiant, & Domui nostræ ad idem jus idemq;
servitium teneantur, quod illi nobis exinde facere
debuerunt, & nos ea ipsis porrigere sine ulla difficultate
debemus.

Licentiamus etiam, si fortè aliquis
antedictorum Civium necessitatis causâ allodium su-
um, vel X. mansos ad majus, ab alijs Bonis suis separa-
re voluerit & vendere separatim, is idem jus idemq;
servitium Domui nostræ debet facere de reliquo, quod
priùs de toto noscitur debuisse. Is verò, qui idem al-
lodium vel X. mansos emerit, debet ratione ejusdem al-
lodii, cum armatura, quæ Plata vulgariter dicitur, &
aliis levibus armis & uno equo, ad arma talia compe-
tente, Domui nostræ ad tale obsequium esse asstrictus,
quale inferiùs pleniùs describetur, Addentes, ut nul-
lus eorum, qui nunc à Domo nostra hæreditati esse no-
scuntur, hæreditatem aliquam possit emere præter u-
nam.

Statuimus siquidem, ut, quicumq; XL. man-
sos vel amplius à Domo nostra emerit, is cum plenis
armis & dextrario operto, & armis talibus competen-
te, & aliis duabus ad minus equitet.

Qui verò
pauciores mansos habuerit, cum Plata & aliis leviori-
bus armis, & uno equo, ad arma talia competente, de-
bet cum Fratribus nostris in expeditionem, quoties ab
eis requisitus fuerit, pergere contra Pruthenos, qui Po-

mezani largo vocabulo nuncupantur, & contra omnes
 2) Terræ Culmensis turbatores.

Cum verò præfati Pomezani in Terra Culmensi, præstante Domino, fuerint
 ulterius meritò non timendi, omnes Cives prædicti ab
 omnibus expeditionibus sunt exempti; ad defensionem
 tamen Terræ, videlicet usq; ad Wislam, Ozzam & Dri-
 wanzam cum Fratribus procedere tenebuntur, ut præ-
 dictum est, contra Terræ quoslibet inuasores.

Item
 statuimus, ut quilibet homo, hæreditatem à Domo no-
 stra habens, Fratribus nostris solvat exinde unum num-
 mum Coloniensem, vel pro eo quinque Culmenses &
 pondus duarum marcarum ceræ, in recognitionem do-
 minii, & in signum, quòd eadem Bona sua habet à Do-
 mo nostra, & nostræ debeat jurisdictioni subesse, &
 Nos eum favorabiliter confovendo contra eos, qui sibi
 injuriam intulerint, debemus, in quantum possumus,
 nostrum præsidium impartiri.

Prædictum autem
 censum singulis annis in die Beati Martini, vel ab ipso
 ad XV. dies dare debent. Quicumq; autem in prædi-
 cto termino non dederit censum suum, taliter puniatur:

Post primos XV. dies in X. solidis; Elapsis verò aliis
 XV. nisi persolverit, X. solidorum debito sit astri-
 ctus; Item evolutis aliis XV. diebus tertio in aliis X.
 solidis, si non solverit censum suum, puniatur, Et
 tunc pro his XXX. solidis, & pro censu suo tempore
 non soluto, ejus pignora, sine omni contradictione,
 accipi faciet, & habebit accepta, donec ei satisfaciat,
 Domus nostra.

Item si fortè aliquis debitum ob-
 sequium suum, quod Domui nostræ debere dignosci-
 tur in expeditionibus peragendis, non impenderit, &
 absens fuerit, Provisor Terræ de Bonis absentis alium

statuat

statuat loco sui, sic ut Domus nostra sui juris in hac parte sentiat nullatenus detrimentum. Item statui-
mus, ut si fortè aliquis ex supradictis Civibus recedens à Terra pactiones suas Domui nostræ non fuerit profecutus, eidem infra XVIII. septimanas tres termini cum sententia præfigantur; Quòd si infra easdem XVIII. septimanas non satisfecerit, poenæ XXX. solidorum nostræ Domui reddendorum subjacebit; Et si nec tunc emendaverit, singulis sex septimanis ad satisfactionem in totidem Culmensis monetæ solidis compellatur; Si verò infra annum neglexerit emendare, Domus nostra se de omnibus Bonis suis, donec satisfaciat ei de omnibus, intromittat. Volumus autem, ut de Bonis prædictorum Civium, de quolibet aratro Theutonicali unus modius tritici, & unus filiginis in mensura Wladislavien, quæ vulgari nomine Scheffel dicitur, cui mensura Culmensis est adæquata, Et de Polonicali aratro, quod Hase dicitur, unus modius tritici, in eadem mensura annuatim Diocesis Episcopo pro Decimis persolvatur. Si verò idem Episcopus prædictos homines pro aliis Decimis angariaverit, pro his Domus nostra tenebitur respondere. Item statuimus, ut una moneta, Culmensis videlicet, sit per totam Terram, & ut depuro & mundo argento denarii fabricentur, Ipsi quoq; denarii in tanto valore perpetualiter perseverent, ut eorum LX. solidi ponderent unam Marcam, Et dicta moneta non nisi semel in singulis decenniis renovetur, & quoties renovata fuerit, XII. novi nummi pro XIII. veteribus cambiantur, ut unusquisq; liberè emat quæcumq; rem, quæ venalis in foro portari consuevit. Item quantitatem mansorum juxta mo-

rem flammingicalem statuimus observari. Absolvimus etiam totam Terram prædictam ab omni penitus telonei exactione.

Et ne præmissæ Constitutiones, promissiones ac pactiones ab aliquo Successorum nostrorum infringi valeant aut mutari, præsentem paginam conscribi fecimus, eam bullarum nostrarum appensionibus roborando.

Hujus rei testes sunt Fratres nostri Popo de Osterna, Albertus de Langenberch, Theodoricus Marschalcus, Berlewinus in Culmæ, Ludowicus in Quidzin Provisores; Seculares verò Burchardus Burggrabijs Megdebergensis, Joannes de Pach, Fridericus de Scherwest, Bernhardus de Kamenz, & alii quamplures, tam religiosi, quàm seculares.

Acta sunt hæc in Thorun Anno incarnationis Dominicæ Millesimo Ducentesimo trigesimo tertio, Quinto Calendas Januarii.

Quoniam igitur hoc Privilegium per Nos Fratrem Eberhardum de Seyne est renovatum, de consilio Fratrum nostrorum, Civiumq; sæpedictorum consensu, quædam in eo sunt mutata, articulis scilicet quibusdam exceptis, & quibusdam interpositis, qui in Privilegio non continebantur antiquo.

Ut autem hæc nostra felix donatio firma & inconcussa permaneat, nec in posterum ab aliquo possit infringi; Cives quoq; dicti super hac sui mutatione Privilegii nullum penitus gravamen sustineant, præsentem paginam Sigilli nostri munimine roboramus.

Huius rei testes sunt Fratres nostri, Ludowicus Provisor Prussiae, Henricus Commendator Terræ Culmensis, Henricus Marschalcus, Henricus Stango in Christeburch, Harth-

mundus

mundus in Elbingo, Mengotus in Balga, Quhalo in Zantir, Joannes in Culm̄e, Ravino in Thorun, Hertwicus in Redino Commendatores, Fratresq; Domus Seniores, Theodoricus de Sulinge, Conradus de Norenberch, Volpertus de Marpurg, Henricus de Moguntia: Seculares verò Joannes Scultetus, Reinico, Razo, Radolphus, Ludeko, Eckehardus, Wasmundus, Cives Culmenfes: Feodales verò Hildebrandus senior, Gotfridus, Fridericus de Neu, Wilhelmus, Hermanus Schultetus in Thorun, Dithardus, Conradus, Lampertus, Lutdechus, & alii quamplures, tam Religiosi quàm Seculares. Datum in Culm̄e Anno incarnationis Dominicæ Mil efimo, Ducentesimo, Quinquagesimo Primo, Calendis Octobris, etc.

PRIVILEGIUM
TERRARUM PRUSSIÆ,
à D. CASIMIRO
POLONIÆ REGE,

*earum Incolis, cum excusso Cruciferorum
jugo in sua essent potestate, & sponta-
neam deditioem fecissent,
concessum.*

IN Nomine DOMINI. Amen. Ad perpetuam rei
memoriam. Nos CASIMIRUS DEI gratia Rex Po-
loniæ, necnon Cracoyiæ, Sandomiriæ, Siradiæ, Lan-

ciciæ, Cujaviæ, Magnus Dux Lithvaniæ, Ruffiæ, Pruf-
 fiæq; Culmenfis, Kynsbergenfis, Elbingenfis, & Po-
 meraniæ Terrarum Dominus & Hæres: **B**enigni-
 tas Regalis excellentiæ noſtræ, quam illi propicia inſpi-
 rat divinitas, & naturalis originalisq; præſtat inſtitu-
 ctus, Eſſi univerſos, juſtum præſidium noſtrum & tu-
 telam expetentes in ſinum miſerationis & protectionis
 ſuſcipit; ad illorum tamen profectus, defenſionem &
 commoda inclinatur uberiùs, qui erga Nos & Regnum
 noſtrum tam fervido cordis feruntur affectu, ut calami-
 tates oppreſſionesq; ſuas hæctenus illis regentium ty-
 rannide multifariè illatas, Non per alterius niſi per no-
 ſtram dextram credant faciliùs reſcindi, nec cujuſpiam
 throno, quàm noſtro, à quo priſcis temporibus illicita
 alienatione exciderant, juſtiùs poſſe & regi & conti-
 neri, non tam ſuperbo & avaro, quàm injuſto renun-
 ciando imperio; Talium ſiquidem firma conſtantia fi-
 desq; ſincera non ſolùm dignis laudum præconiis attol-
 li, verùm etiam Regalium meretur & debet beneficiis
 compenſari. Significamus itaq; univerſis tam præſen-
 tibus quàm futuris, qualiter Eſſi Prælatorum Spiritua-
 lium & Secularium, Magnificorum, Strenuorum, No-
 bilium, Militarium & prudentium, videlicet Terrigena-
 rum, Civium & univerſæ Communitatis Terrarum Pruf-
 fiæ, Culmenfis, Kynsbergeñ, Elbingeñ, & Pomeraniæ,
 crebris precibus & legationibus ſuperioribus tempori-
 bus fuiſſemus rogati, quatenus ipſos in eorum ſuribus,
 libertatibus, immunitatibus & Privilegiis; Et ſignanter
 in **Unione & Liga**, per ipſos ritè & ſincerè inita & con-
 dita, per Magiſtrumq; & Ordinem Prufſiæ admiſſa,
 ad cu-

ad cuius enervationem & violationem Magister & Ordo variis viis, coloribus & violentiis hactenus usus est, In quorum firmitate vel collapsu foedus pacis perpetuæ, cum Magistro & Ordine Cruciferorū Sanctæ Mariæ de Prussia, per germanum nostrum Divæ memorię Serenissimum Principem Dominum W^LA^DI^SL^AU^M Poloniæ & Hungariæ Regem firmatum, subsistentia dependet vel ruina, & quod præfatus Magister & Ordo, Liga & Unione eorum demolita, dirumpere, novaque bella nobis & Regno nostro inferre destinabant, Ipsosq; Militares & Cives injusta secum gerere bella impellebant, manutenere & defensare dignaremur: Afferentes, se jugum oppressionum, calamitatum & gravaminum, hactenus à Magistro & Ordine cervicibus eorum violenta tyrannide innexum, & præfatæ Unionis & Ligæ rupturam nullatenus, nisi provisio nostra, qui Ordinis illius fundator, dotator & Patronus sumus, celeriter intervenerit, tolleratuos: Nos tamen nullum eorum calamitati præstandum censuimus suffragium, Sed parti utrique reconciliationi persuasimus esse insistendum, ne alere oriens incendium videremur.

Verum cum temporis processu differentia partium adeò crescendo invalesceret, ut Prælati Spirituales & Seculares, Militares, Terrigenæ & Cives Terrarum prædictarum, spe extrema destituti, & injuriarum magnitudine pressi, violentis dominis, Jura & Privilegia atq; immunitates eorum pro libitu frangentibus, nullatenus sibi de cætero parendum duxerunt, sed Legibus divinis & humanis innixi, quæ injustis Dominis, scelus & nephas agentibus, nullatenus parendum decernunt: Obedientia & subjectione Magistro & Ordini subtra-

eta, Nos per Magnificos & Spectabiles milites, Prudentesq; viros Joannem de Baysen, Augustinum de Schewe, Gabrielem de Baysen, Nicolaum de Wolkowo Judicem Dirschovieñ, Laurentium Czeitz Culmeñ, Ruthigerum de Birken Thoruneñ, Laurentium Pilgrim Elbingeñ Præconsules, Joannem Call Brunsparieñ, Gregorium Schwach Crolowgrodeñ, Nicolaum Rodeman de Knypow, Wilhelmum Jordan militem, & Joannem Meidburg Gedanenses Consules, ambasiatores & nuncios suos cum pleno mandato & legatione ad nos transmissos novis precibus & legationibus sollicitarent, Quatenus non jam tantum eorum defensionem, quantum gubernationi & regimini insistere, deditio nemq; eorum, subjectionem, fidelitatem & perpetuam obedientiam, quam Nobis suo & omnium Prælatorum Spiritualium & Secularium, Militarium, Terrigenarum, Civium & Incolarum Universitatis totius Terrarum prædictarum nominibus obtulerunt, suscipere, velut legitimus, justus & verus Dominus & Hæres Terrarum prædictarum, ac Terras præfatas ad naturam & sortem suam redeuntis, Regno Poloniae, à jus corpore, nova & recenti memoria, contra jus phasq; sequestratæ fuerant, Incorporare, inviscerare, reunire, appropriare atque consociare & consolidare dignaremur; Alterius principatum & deditio nem, si regimen, si imperium, non tam per eos Nobis delatum quam redditum, abjici contingeret, quæsituri.

Nos superiora cogitatione & animo revolventes tempora, quibus nonnullæ ex Terris prædictis per Reges & Principes Poloniae jure legitimo & hæreditario possessæ,

fesse, tandem prædecessori nostro **W**LADISLAW Regi Po-
 loniæ, bello cum finitimis & infidelibus occupato, vi
 & armis per Magistrum & Ordinem Prusiæ abstractæ,
 nunquam juris & proprietatis Regni nostri Poloniæ es-
 se desierant; Quemadmodum aliquot Sedis Apostolicæ
 Delegatorum, Terras ipsas Regno Poloniæ adjudican-
 tium, diffinitivæ Sententiæ infallibili concludunt ar-
 gumento: Revolventes insuper, Magistrum &
 Ordinem Prusiæ à prædecessoribus quondam nostris
 Poloniæ Principibus & Dominis ad impugnationem in-
 fidelium accersitum, institutum & dotatum, magis fi-
 delium & præsertim eorum Principum, quorum benefi-
 cio instituti dotatiq; erant, quam barbarorum & infi-
 delium impugnationi, contra quos se indefessè milita-
 turos patentibus literis astrinxerant, vacavisse, Ter-
 rasq; eorum usurpasse, Nec juxta professionem religio-
 nis suæ contra infideles Tartaros aut Turcos, Catholi-
 ca Regna & Dominia infestantes, quamvis eorum cre-
 bro expetitum fuisset auxilium, militasse: Sed & in-
 super Reges Poloniæ cum Tartaris aliisque infidelibus bel-
 la gerentes à tergo invasos à gerendo bello in præsens &
 posterum cum infidelibus avertisse, & suspicionem bel-
 li ab illis imminentis veritos, potentiis distractis & con-
 tra illorum insidias relictis, vacare infidelium impugna-
 tioni nullatenus, sicut expediebat Christianæ fidei, po-
 tuisse: Quàm insuper fragili & fluxa fide erga
 clarissimum genitorem nostrum Dominum **W**LADI-
 SLAUM Poloniæ Regem fuerint, quater per ipsos ru-
 pta violataq; foedera, totiesq; Regno Poloniæ per eos
 illata arma, quibus Regnum Poloniæ in suam redigere
 ditio-

ditionem destinaverant, nisi cladibus multiplicibus obruti domitiq; fuissent: Nec unquam illis voluntatem, Nos & Regnum Poloniae laceffendi, sed facultatem defuisse, petita per illos à Concilio Basiliens & Sede Apostolica, de rumpendo foedere, ultimò cum Regno nostro sancito, licentia demonstrant. Silentio tegere non possumus injuriam Magistri & Ordinis Prussiae in exigenda à Mercatoribus subditisque nostris Dacia, Sunt et os / quæ licet ex foedere exigì à nostris transmari- nisq; mercatoribus non debebat, si Prussiae mercatores ab illa solvi quoquo modo contigisset: Continuata tamen fuit pluribus annis hujusmodi in nostris transmari- nisq; mercatoribus exactio, Prussiae mercatoribus il- lius obtinentibus in notabili parte relaxationem.

Portiones & sortes Terrarum Regni nostri Poloniae & Ducatus Magni Lithvaniae, priscais temporibus per Magistrum & Ordinem occupatas, non solum Nobis, Regno Poloniae, & Ducatui Magno Lithvaniae juxta foederis ordinationem Magister & Ordo Prussiae non restituit, sed insuper plura & ampliora occupavit.

Accedit tristis horrendaq; Tyrannidis memoria, Ci- vium de Choczno, qui in præterito bello in fidem Pa- tris nostri concesserant, sæva cædes & trucidatio, quo- rum à se defectionem nedum ferro aut mucrone, sed nec aliquo levi verbo aut memoria ullo unquam tempore se- juramento corporali & literis repromiserunt, per fo- dus ultimò cum illis ictum, & quod solo hujusmodi exo- crando scelere publicè violarunt, mulctaturos.

Quo non contenti, Mercatorem Virum Moszier ex eo, quòd navigijs per flumen Wissa in Cracoviam,

merces

merces devexerat, capitali damnaverunt sententia; ne memorabilis sui facti exemplum ceteros in sequelam similem traheret, sed potius sæva mulctatio quoslibet deterrendo profectum Regni nostri aboleret.

His itaq; & pluribus aliis evidentibus legitimisque respectibus persuasi, admoniti & inducti, communicato cum Prælati, Principibus, Baronibus, cæterisque Regnorum, Ducatum & Dominiorum nostrorum consilio, ac de eorum expressa voluntate, approbatione, gratificatione & consensu, ne divinæ voluntati, quæ hæreditatem nostram occupatione illicita solvendam nobisq; reddendam pia miseratione censuit, videamur resistere, & calamitosis afflictisq; subditis nostris openam nostram implorantibus deesse: Veritiq; ne Dominia, sortes & Terras & hæreditates nostras alius illicitus occupator Tyrannusq; ex quo nobis hostilitas major consurgeret, invadat: Ad honorem omnipotentis Dei, ejusq; genitricis Virginis Mariæ, S. Adalberti Martyris, Sancti Stanislai Prothomartyris Poloniae ac totius Ierarchiæ coelestis, præfatorum Prælatorum Spiritualium, & Secularium, Militarium, Civium, Terrigenarum & omnium Incolarum Terrarum Prusiae, Culmenfis, Kynsbergen, Elbingen & Pomeraniæ, in terra mariq; sitarum, benevolam & spontaneam deditionem, regimen, tutelam, gubernationem, subjectionem, obedientiam, accepimus, assumpsimus, tenoreq; præsentium, non per errorem aut improvidè, sed de certa nostra scientia & voluntate, in DEI nomine assumimus & acceptamus, Terrasq; & Dominia prædicta Regno Poloniae reintegramus, reunimus, invisce-

ramus & incorporamus, & ad usum, participationem
omnium honorum, jurium & libertatum, & prærogati-
varum, quibus Prælati, Barones & Nobiles Regni Po-
loniæ hætenus potiti sunt. Et signanter ad futurorum
Regum Poloniæ, quotiescunq; super Electione & Co-
ronatione illorum fieri deliberationem contingat, Ele-
ctionem & Coronationem admittimus, annectimus &
includimus: Promittentes pro Nobis, Hæredibus &
Successoribus nostris, ac universo Regno Poloniæ, quòd
prædictas Terras & Dominia, atq; Prælatos Spirituales
& Seculares, Barones, Militares, Nobiles, Cives, Oppida-
nos & cujuscunq; conditionis, status vel præminentiae
homines existant, hætenus in illis commorantes & in
posterum commoratuos, favore, gratia, benevolentia,
& affectione Regali prosequemur, & contra quasunq;
adversitates, impugnationes quorumcunq; hominum,
illis præstabimus, velut fidelibus & subditis nostris, Re-
galem assistentiam & defensam: Nec illos aut Terras
prædictas à corpore & integritate Regni nostri Poloniæ
alienari, sequestrari, scindi patiemur. Promittentes
insuper pro Nobis, Hæredibus & Successoribus nostris,
quòd præfatos Prælatos Spirituales & Seculares, ac Sa-
cras aedes & Ecclesias, Barones, Nobiles & Cives atq;
singulos Incolas Terrarum nostrarum prædictarum,
Prusiae, in juribus, libertatibus, literis, Privilegiis, im-
munitatibus eorum, quæ à Principibus Spiritualibus
& Secularibus, Regibus & Dominis Terrarum prædi-
ctarum obtinent, conservabimus, fovebimus, defen-
demus. Nec unquam ea violabimus aut prævaricabi-
mur, aut violari vel prævaricari quomodolibet permit-
temus.

Si autem alicui Civitati vel privata perso-
næ Pri-

nã Privilegium amiffum fuerit, aliud de confilio Con-
 fultiariorum Terrarum illarum gratiofè dabimus & largi-
 emur, dummodò in hæreditatis & Bonorum, quorum
 à Nobis petetur literalis innovatio, petens fuerit in pa-
 cifica, continua, & præfcriptionem habente poffeffio-
 ne. Ut autem noftræ liberalitatis, æquitatis & iufti-
 ciæ dextram, his fubjectionis eorum & noftræ accepta-
 tionis felicibus, dante DOMINO, primitiis, fentiant
 in univerfos & quemlibet eorum effufam, & in mutatio-
 ne Principum commutatam etiam & fublata deprehen-
 dant oppreffionem, Daciam, quæ in vulgari Sunthczol
 dicitur, Item alia omnia telonea in aquis & terra, no-
 va aut antiqua obfervantia, in Terris duntaxat prædi-
ctis Prufiæ quomodolibet constituta: Item in Terra
 Pomeraniæ exactionem five Daciam, quæ Porcus, alias
 Narzafz, veteri institutione Ducum Poloniæ vocabatur
 Regia munificentia tollimus, abrogamus, deponi-
 mus, ac folutionem illarum perpetuis temporibus refol-
 vimus, dimittimus & relaxamus, Nullo unquam tem-
 pore per Nos aut Succelfores noftros Poloniæ Reges, ex
 quacunque caufa aut occafione instituendam aut impo-
 nendam. Item licet Magifter & Ordo tempore
 occupationis Terrarum prædictarum omnia bona &
 merces quarumcunq; manerierum, divina permiffione
 naufragium in mari pafforum, velut propria ex naufra-
 gio quafi iuris fui facta occupabant, Nos tamen, qui
 Rex Catholicus fumus, fortem huiusmodi naturali &
 divino jure Sedisq; Apoftolicæ decreto damnatam,
 velut crudelem & iniuftam execramur, pollicemurque
 quòd res & bona, cujuscunq; ponderis & valoris exi-
 ftant, earum perfonarum, quæ maris naufragio pericli-
 tabun-

tabuntur, nunquam per Nos aut Officiales nostros, velut nostras aut juris nostri petemus aut requiremus, Sed illas absque diminutione per eos, quorum ante naufragium fuerunt, aut eorum propinquiores, demonstratione evidenti propinquitatem probantes, colligendas & in usus beneplacitos decernimus convertendas: Contrariae consuetudini aut juri, vel potius corruptelae, pro Nobis & Successoribus nostris renunciando, Nisi forte nullus bonorum hujusmodi extaret justus heres & successor; Quoniam in casu illo bona, ex naufragio habitata, nostrae volumus potestati subiacere. Item omnes

6
Indigenas

Prelatos, Militares, Nobiles, Cives & Incolas Terrarum praedictarum in jus, conditionem & proprietatem Regni Poloniae translatos & invisceratos, hac etiam prosequemur Praerogativa, Quod Dignitates & Officia hactenus illic consistentia & in posterum constituenda: Item Castra & Tenutas Civitatum & locorum in Terris praedictis, nulli extraneo aut forensi, sed proprio Indigenae juxta observantiam aliarum Terrarum Regni nostri conferemus.

7

Item omnes Causas notabiles, dictas Terras concernentes, cum communi Consiliariorum, Spiritualium & Secularium, Nobilium & Civitatum, Majorum consilio Terrarum praedictarum terminabimus, tractabimus, & diffiniemus.

8

Item Terras praedictas sub nostro regimine & Regni Poloniae corpore consistentes, in suis antiquis gadibus, limitibus & terminis conservabimus, tuebimur, & defendemus, Nec terminos & gades Terrarum ipsarum in aliquo diminui vel periclitari, velut Regni nostri partes individas, ullatenus patiemur.

9

Item cum Terrae ipsae & homines ipsas incolentes variis hactenus Legibus si-
ve Juri-

ve Juribus, videlicet Magdeburgenſi, & Culmenſi, Po-
 lonicali hæreditario & Pruthenico, in decidendis qui-
 buſvis eorum quæſtionibus & administratione juſtitiæ
 utebantur, quod etiam illis ſub noſtro Principatu & re-
 gimine volumus firmum eſſe & perhenne: Ea licentiã
 attributa, ut liceat cuicunq; de uno jure in aliud, ſine
 tamen aliorum præjudicio, quò voluerit, transmigra-
 re. Item cum Monetæ juſtam & fidelem ligam,
 pondusq; habentis cuſio Terram quamlibet & nobilitet
 & fœcundet: Volumus, ut in quatuor locis Terra-
 rum prædictarum, videlicet in Thorun, Gdansk & El-
 bing & Kynsburg, duntaxat gwerra præſenti duran-
 te, fidelis & juſta, imaginem noſtram & ſubſcriptio-
 nem tituli noſtri continens, Moneta cudatur, præfa-
 torum Prælatorum Spiritualium & Secularium, Milita-
 rium, Civium, Terrigenarum Terrarum prædictarum
 impenſis. Pace autem, Domino ſuffragante, habita,
 tantum in Thorun & in Gdansk, ſine præjudicio Privi-
 legii Thorunienſis Civitatis, Noſtris Regalibus cudatur
 impenſis; Proviſo tamen, quòd Moneta ipſa in pon-
 dere, & grano & liga debita nullatenus minuatur.

Item quia Nos pro benè gerendis rebus Dominio-
 rum noſtrorum in varia sæpè loca & à Terris prædictis
 diſtantia neceſſe eſt facere deſcenſum, Ne igitur per no-
 ſtram abſentiam Terræ ipſæ aliquod contrahere poſſent
 periculum vel periclitationem: Nobiles viros pro illius
 tuitione & gubernatione, de eorum legalitate, fide &
 merito conſiſi, ad noſtræ duntaxat beneplacitum vo-
 luntatis, ac cum conſilio Prælatorum, Conſiliariorum,
 Civitatum Majorum, prædictæ Terræ deputabimus, ad
 quos in noſtri abſentia ſuper quolibet defectu & even-
 tu habea-

tu habeatur recursus, providentia, provisione & autoritate illorum supplendus & emendandus. Item

Mercatoribus Terrarum prædictarum Prussiae in Regnum, Ducatus & Dominia nostra venientibus hanc libertatem & prærogativam de cætero volumus conservari, ut quoties illos in quacunque loca, Civitates & Oppida Regni & Dominiorum nostrorum venire cum mercibus eorum, cujuscunq; speciei vel maneriei existant, contigerit: licitum erit eis hujusmodi merces in loca, testudines & cameras & tecta, quarum illis libera præstari debet arrendatio, deponere & pro suo arbitrio exponere in venalitatem, Stratasq; omnes versus Hungariam, Russiam, Moraviam, Slesiam, Austriam, Saxoniam, Wallachiam, depositis tamen theloneis, Et stratis antiquis Civitatum Regni & Dominiorum nostrorum semper salvis.

Harum, quibus Sigillum nostrum præsentibus est appensum, testimonio Literarum. Actum Cracoviæ feria quarta Cinerum Anno Domini Millesimo, Quadringentesimo, Quinquagesimo Quarto: Præsentibus ibidem Reverendissimis in Christo Patribus, & Magnificis Dominis Sbigneo Dei gratia tituli S. Priscæ presbytero Cardinale & Episcopo Cracoviensium, Joanne eadem gratia Sanctæ Gnesnenæ Ecclesiæ Archiepiscopo & Primate ejusdem: Joanne, Vladislavienensium, Andrea Posnaniensium, eadem gratia Episcopis. Joanne de Czyszow Castellano & Capitaneo, Joanne de Tanczin Palatino Cracoviensibus. Luca de Gorka Poznaniensium, Joanne de Oleffnicza Sandomiriensium, Petro de Opporow Lancziciensium, Nicolao de Scharley Brestensium, Palatinis. Petro de Schamotuli Poznaniensium, Prebtorio de Konyeczpole Sandomiriensium, Castellanis.

Petro

Petro Schaffranyecz de Pyeschkowafcala Cracoviē,
 Michaële de Lafotky Lancicien Succamerarijs, & ali-
 is quamplurimis generosis & nobilibus fide dignis ad
 præmissa testibus: Datum per manus Magnificorum,
 Joannis de Konyeczpole Cancellarii, & Petri de Scze-
 kokziny ViceCancellarii Regni Poloniæ sincerè nobis
 dilectorum: Relatio Magnifici Joannis de Konyecz-
 pole Regni Poloniæ Cancellarii.

RECIPROCA
 SPONSIO, QUAM IN
 D. CASIMIRI
 POLONIÆ REGIS

verba, Ordines Terrarum Prussia, pro
 temporum illorum conditione,
fecerunt.

IN Nomine DOMINI, Amen. Ad perpetuam rei
 Memoriam. Legum divinarum humanarumq; salu-
 berrimæ sanctiones, instituta & decreta, quoslibet feu-
 dales & subditos jugum subjectionis & obedientiæ per-
 mittunt excutere, & in sortem regimenq; justorum Do-
 minorum se conferre, dum Rectorum & Principantium
 temeritas, frenis laxatis licentiæ, per quælibet devia &
 abrupta graditur, & manus non solum iniquas ad irro-
 gandas injurias, sed etiam ad effundendum sanguinem
 innocentem cruentas immoderata audacia porrigens,
 D quasi

quasi apud Deum ultionum omnis vindictæ ratio con-
 quieverit, debacchatur. SED neq; ad culpam contu-
 meliamq; justus rerum æstimator retorqueat, sed po-
 tiùs ad providentiæ argumentum, si onere oppressio-
 num subditi impulsî, opportuno justoq; mutationis re-
 medio, superbum, injustum atq; avarum abrogent im-
perium, & in ditionem potestatemq; alterius transmi-
 grent, conditione actionum & temporum facultatem,
 illis subministrante. Proinde nos Prælati, Barones,
 Militares, Nobiles, Cives, Oppidani & Incolæ Ter-
 rarum Prussiæ, Chelmen, Pomeraniæ, & Michalovien,
 Status Ecclesiastici & Secularis, Significamus tenore,
 præsentium universis, tam præsentibus quàm futuris,
 Qualiter etsi superioribus temporibus Proavi, avi & ge-
 nitores nostri, & tandem nos, graves innumerabilesq;
 à Magistro & Ordine Prussiæ pertuliffemus oppressio-
nes: dum non solum Magister, sed & sui Commenda-
 tores, in nos desæviendo, plerosq; ex nobis nullo jure,
 servato capitibus plecterent, alios proscriberent, alios
 bonis temporalibus multarent: & quod dictu quoque
 nefas est, conjuges & filias nostratum stupris & adulte-
 riis violentis vitarent, in quosdam ex nobis, ut truci-
 daremur, ut venundaremur, caperemur, & depacta-
 remur, facultatem conferendo, totq; cogebamur reco-
 gnoscere & profiteri Dominos superbe avareq; nobis
 imperantes, quot Terra Prussiæ gessit Commendatores,
 cum unusquisque illorum plenam principandi & impe-
 randi apud se consistere arbitrabatur potestatem.
 Qua quidem inflati licentia, oblii professionis, qua
 contra infideles militare sponponderant, nulla offensa aut
 injuria provocati, in Reges Principesq; Poloniæ, quo-
 rum be-

rum beneficio accersiti ad impugnationem infidelium dotatiq; & instituti fuerant, arma convertebant, fœdere primùm cum D. CASIMIRO, deinde cum D. VLADISLAO Regibus Poloniæ per illos quater firmato, & totiens violato, Regni Poloniæ Terras, nisi cladibus domiri fuissent, decreverant occupasse: cogentes nos ad gerendum secum injusta bella, licet nobiscum nunquam rem integram communicati fuissent, cum illos ad illa obeunda, alienos fines occupandi fames aut livor fastusque, non justa causa, urgeret: in quibus clades, orbitates, fortunarumq; & rerum nostrarum periclitationes illic exceptas tantò majore amaritudine prosequimur, quanto constat nos imperio Præsidium nostrorum coactos, non corporum solum & rerum, sed etiam animarum nostrarum per injustas acies sæpius contraxisse discrimen, & capitibus nostris omne scelus injusti belli expiasse, Magistro & Ordine nostras clades magis ex arce spectantibus, quàm relevantibus. Verùm cum tot mala nullo termino aut spacio videremus finiri, atq; nobis posterisq; nostris majores calamitates, orbitates, Magistro & Ordine Prussiæ ad rumpendum cum Rege, & Regno Poloniæ foedus percussum ultimò corporali interposito juramento, à quo se absolvi Concilii Generalis Basilien & Summi Pontificis autoritate multiplici instantia expetebant, & bellum de novo gerendum aspirante, parari: Ligam & Unionem, omnem justitiam æquitatemq; redolentem, non quæ illis justam potestatem adimeret, sed quæ injusta illos bella suscipere, & in nos, absq; jure, denudato vacuo uti mucrone, nosq; fortunis & rebus spoliare nostris prohiberet, inivimus: Hanc cum annis pluribus per nos, Magistri & Ordinis

consensu, ac Imperialibus Privilegiis & confirmationibus desuper dotati, habuiffemus in usu, observantia & praxi, tanto ardore, cura & sollicitudine, pro illius perpetua abolitione certatim non erubuerunt insistere, ut nos velut ethnicos hæreticosq; coram Summo Pontifice asserent, & deinde ad Imperiale traherent tribunal, non quò per abrogationem violationemque hujusmodi nostræ Unionis & Ligæ aliquid commodi aut profectus capefferent, sed ut eò liberiùs, obstante illis nemine, execranda bella Regi & Regno Poloniæ cæterisq; finitimis, nostris tandem cervicibus, ut sæpè aliàs accidebat, expianda, moverent. Licet autem coram Tribunali Cæsareo comparendi nulla nos arctaret conditio vel potestas, cum Imperiali ditioni nunquam nos remur subjectos esse; Ut tamen nihil restaret, quo nostra argui posset justitia, & pura, quam in his ad pacem reconciliationemq; cum Magistro & Ordine gerebamus, intentio, accusati Tribunal hujusmodi accessimus, & anno propè uno exacto, cum personarum nostrarum amplissimo discrimine, in querelis propositionibusq; & replicationibus versati, licet causam pluribus justificationibus fundatam haberemus: Tantus tamen favor Magistro & Ordini in pronuncianda Imperiali Sententia habitus est, ut Liga & Unio nostra hujusmodi, pro qua omne certamen fuit exortum, inhibitione Cæsaris, per nos tanquam jure arbitrario facta, rejecta cassaretur. Magistro nihilominus & Ordine posthæc instantibus, ut in sexingentis florenorum millibus Magistro & Ordini solvendis, & adeò Magistro & Ordini obnoxii fuisset & fore, juxtà ac si precio empti essemus, nova Cæsareâ Sententiâ damnaremur: Vige-

re cuius ad trecentorum ex nobis principalium capitalem trucidationem processuros se, & ultionem quamlibet in nobis velut servis empticiis & obnoxiiis sumpturos, terrore publico & clamore disponebant. Quæ quidem Cæsarea Sententia, & ejusdem Magistri & Ordinis Prusis instantia, ultra quoq; de nobis extendenda adeò nobis indigna, prout erat, visa est, ut non viris modò sed fœminis, non Catholicis sed Scythis fœdum ac intollerabile esset, ad tantam obnoxietatem calamitatemq; detrudi.

Tot igitur & tantis pluribusq; aliis, quas, ut nostro consulamus honori, silentii tegimus velamine, oppressionibus, oneribus, gravaminibus atque injuriis lacessiti, præsertim cum illas videremus in infinitum trahi, & novo genere crescere & augeri, superbo, avaro & injusto præfati Magistri & Ordinis dominio, autoritate, & suffragio naturalis & humanæ Legum, renunciavimus: omnem obedientiam, fidem & subjectionem illis & cuilibet eorum subtrahendo. Verum cum Regem & Coronam Poloniæ præfati Ordinis Patronum, fundatorem & dotatorem: ac Terras prædictas, videlicet Prusis, Culmen, Pomerania & Michalovien, à corpore & proprietate Regni Poloniæ præter justitiam & æquitatem per vim & arma alienatas, constat extitisse, prisco nostro capiti & primævo corpori, à quo excideramus, postquam juris nostri esse cœpimus, illicò nos reuniendos reintegrandosque censuimus: quò amplius liquere possit, renunciationem & subtractionem obedientiæ Magistro & Ordini, excutiendo tyrannicum jugum & superbum avarumq; præsidium, per nos factam, non solum vendicationem libertatis, sed justum Principatum, im-

tum, Imperium & solium quæsvisse. In hunc itaq;
 morem ad Serenissimum Principem D. CASIMIRUM Dei
 gratia Poloniæ Regem, Magnum Ducem Lithvaniæ, &
 hæredem Rursiæ, & Coronam Poloniæ, in quos jure
 divino & humano præfatarum Terrarum hæreditatem
 & omnimodam successiõnem comperimus devolutam,
 solennes nostros Nuncios, videlicet Magnificos, No-
 biles & prudentes Dominos, Joannem de Bayzen, Au-
 gustinum de Schewe, milites: Gabrielem de Bayzen,
 Nicolaum de Wolkow Judicem Derschoviensem, Lau-
 rentium Czeitz Culmen, Rudgerum de Birken Thoru-
 nen, Laurentium Pilgrim Elbingen, Proconsules: Jo-
 annem Kal Brunsbergen, Georgium Schwach Konigs-
 bergen, Nicolaum Rodman de Kniphoff, Guilhelmum
 Jordan militem, & Joannem Meydeburg Gedanen,
 Consules, cum plena facultate transmisimus, ac suæ Ma-
 jestati, & in suum regalem thronum, solium, ditionem
 & potestatem Terras prædictas Prusciæ, Culmen, Po-
 meraniæ & Michalovien, & quascunq; alias annexas,
 in terra vel mari consistentes, personas nostras, castra,
 fortalitia, civitates, oppida, villas, res & fortunas no-
 stras, quæ hactenus in nostra potestate sunt, & in futu-
 rum erunt, dedimus & subjecimus, & præsentibus vo-
 luntariè & spontaneè damus perpetuò & subijcimus:
 Ipsumq; D. CASIMIRUM Regem Poloniæ pro unico
 justo & legitimo Domino & Hærede suscipimus, recipi-
 mus & acceptamus, ac nos & Terras prædictas in jus,
 sortem, proprietatem & titulum Coronæ Poloniæ rein-
 tegramus, reunimus, incorporamus & invisceramus:
 omnium Privilegiorum, libertatum, prærogativarum
 Regni Poloniæ usam & participationem: Et signanter
 commu-

communem cum aliis Regnicolis futurorum Regum Ele-
 ctionem & Coronationem habituri: ipsamque deditio-
 nem, subjectionem, susceptionem & obedientiam ite-
 rum atque iterum profiteamur, & innovamus: subijcien-
 tes nos Terrasq; prædictas in perpetuam præfati D. Re-
 gis, & suorum Successorum, & Regni Poloniæ diti-
 onem, gubernationem, protectionem, potestatem, fide-
 dem, imperium & regimen: Promittentes pro nobis,
 hæredibus & successoribus nostris, sub fide & honore,
 ac onere per nos præstiti juramenti, quod præfato Illu-
 strissimo Principi D. CASIMIRO Poloniæ Regi & ejus
 Successoribus Regibus Poloniæ, velut fideles & subje-
cti, quemadmodum cæteri ejusdem Regni incolæ, pare-
 bimus, auscultabimus & obediemus, fideliter & con-
stanter, perpetuo & in ævum, Juribus nostris semper
 salvis: In ipsiusq; D. Regis & suorum Successorum Po-
 loniæ Regum ditione, potestate, gubernatione, subje-
ctione, imperio & regimine ab hac hora & in perpetu-
 um perdurabimus & consistemus, nec ullo tempore,
 nos à Corona Poloniæ, cujus sumus corpus individu-
 um, scindi, sequestrari, aut alienari permittemus, aut
 consentiemus. Promittentes præfato Dño CASIMI-
 RO Regi & suis Successoribus Regibus Poloniæ, in omni-
 bus felicibus, adversis, & quibuscunque casibus, ope, præ-
 sidio, consilio & auxilio, fideliter, contra quoscunque eo-
 rum hostes & adversarios, & quascunque personas Ec-
 clesiasticas vel Seculares, quacunque præfulgeant digni-
 tate, communitates, universitates, & signanter con-
 tra Magistrum & Ordinem quondam Prusis, Almannie
 & Livoniæ, fideliter, corpore, animo & rebus, & cum
 effectu assistere, & bonum, utile, commodum, hone-
 stum,

stum, ejusdem D. CASIMIRI Regis, & suorum Successorum Regum Poloniae, juxta vires & potentias nostras extremas, efficere, dirigere & procurare: Nec unquam quocunq; colore, arte, necessitate, casu, opportunitate vel ingenio, praefatum D. CASIMIRUM Regem & suos Successores Reges & Coronam Poloniae deferere, aut in praejudicium, laesionem, aut offensam praesentis subjectionis & deditiois nostrae, cum Magistro & Ordine olim Prussiae, & Magistris Almaniae & Livoniae aliquos tractatus, reconciliations, inscriptiones, amicitias, foedera, colloquia vel sermones, absq; ejusdem D. CASIMIRI Regis Poloniae speciali licentia vel consensu, inire per se vel quascunq; submissas personas, directe vel indirecte, palam vel clandestine, absq; dolo & fraude, sub fide & honore. Cui quidem Serenissimo Principi, Dño CASIMIRO Regi Poloniae, quamprimum feliciter Terras Prussiae aut Pomeraniae ingressus fuerit, ad suam requisitionem, plenè praestabimus, praestareq; nos asstringimus, fidelitatis, subjectionis & obedientiae, perpetuo corporali interposito juramento, omagium. Et quod jam in personis praefatorum Nunciorum nostrorum praestitisse nos fatemur & recognoscimus, & praesenti nostra inscriptione pro firmitate ampliori facimus & praestamus. Actum & Datum in Thorun feria secunda proxima post Dominicam Ramis palmarum. Anno Domini Millesimo, Quadringentesimo, quinquagesimo quarto.

PRIVILEGIUM D. CASIMIRI REGIS,

QUO NON TANTUM IPSE REX, SED
præcipui etiam ex Regni Senatoribus solemniter ca-
vent, quòd juxta Prærogativam Ordinibus Terra-
rum Prussiae antea concessam, Castra & Tenutæ
Civitatum atq; locorum nullis extraneis sed
veris Indigenis conferri debeant.

KASIMIRUS Dei gratia Rex Poloniae, Magnus
 Dux Lithvaniae, Russiae Prussiaeque Dominus & Hæ-
 res etc. Significamus tenore Præsentium, quibus expe-
 dit, universis, Quòd, dum ex pluribus evidentibus &
 legitimis respectibus, Terras Prussiae, Pomeraniae etc.
 communicato Principum, Prælatorum, Baronum cæ-
 terorumque fidelium novissime Cracoviae nobiscum exi-
 stentium Regni, Ducatum & Dominiorum nostrorum
 consilio, voluntate & consensu, in regimen, tutelam,
 gubernationem, subjectionem & obedientiam accepi-
 mus & assumpsimus, hanc ipsis Prærogativam concessi-
 mus, Quòd Castra, Civitates & quaecunq; Fortalitia,
 in Terris prædictis existentia, alicui extraneo aut foren-
 si conferre non debemus. Ad præsens tamen certis
 respectibus moti, certa Castra, in præmemoratis Prussiae
 Terris existentia, nonnullis personis contra hujusmodi
 Articulum superius expressum, durante præsentis gwer-
 ra, & interim, quoad Terras Prussiae non pacificabimus,
 dedimus contulimusque in regimen, tenutam & guberna-
 tionem.

tionem. Ideo presentibus in verbo nostro Regio
 spondemus & promittimus, quod pace, Domino suffra-
 gante, habita, prescripta Castra, taliter per nos in haec-
 tenus hujusmodi personis in regimen & tenutam collata,
 juxta tenorem & continentiam Literarum nostrarum
 Cracoviae Terris Prussiae concessarum, illis conferemus,
 quibus conferri debent, Et quod etiam prescriptis Lite-
 ris in omnibus earum punctis, conditionibus, clausulis
 & articulis per hoc non intendimus neq; volumus in ali-
 quo derogare, Sed ipsas sanas, salvas, firmas & illasas
 per nos & Successores nostros perpetuis temporibus te-
 nere & observare pollicemur per presentes, harum, qui-
 bus Sigillum nostrum presentibus est appensum, testi-
 monio Literarum. Et nos Joannes Wladislavien,
 Andreas Posnanien Dei gratia Episcopi; Necnon Lucas
 de Gorka Posnanien, Stanislaus de Ostrorok Callisien,
 Petrus de Opporow Lancicien, Nicolaus de Koscze-
 lecz Wladislavien Palatini; Petrus Skora de Gay Ca-
 llsien, Joannes de Czarnkow Gnesnen, Hincza de
 Rogow Siradien Castellani & Vice Thesaurarius, Pe-
 trus de Szekoczini Vice Cancellarius Regni Poloniae,
 Derflaus de Rythwyan Rosperien, & Nicolaus de La-
 bischin Wladislavien Castellani & c. prescriptas Sere-
 nissimi Domini nostri Regis promissionum Literas ratas
 & gratas habentes presentibus promittimus, quod ipse
 Serenissimus Dominus noster Rex omnia superius ex-
 pressa firmiter & inconcussè inviolabiliterq; tenebit &
 observabit, & pro majori firmitate sigilla nostra etiam
 presentibus sunt appensa. Act. & Datum in Thorun fe-
 ria secunda festi Beati Joannis Baptistae, Anno Domini
 Millesimo, Quadringentesimo, quinquagesimo quarto.

Ad relationem praefati Magnifici Petri de
 Szekoczini R. P. Vice Cancellarii.

PRIVILEGIUM D. CASIMIRI REGIS,

QUO OMNIA JURA PER TERRAS PRUSSIA abrogantur, & Unum Jus Culmense in omnium reliquorum locum sufficitur, ut juxta ejus tenorem omnes Causæ & Controversiæ decidentur & determinantur.

IN Nomine DOMINI, Amen. Ad perpetuam rei memoriam. Cum inter ea, quæ unitatem Domini attestantur, Juris Uniformitas præcipuum habeatur indicium: Proinde nos CASIMIRUS Dei gratia Rex Poloniae, necnon Terrarum Cracoviæ, Sandomiriæ, Siradiæ, Lanciciæ, Cujaviæ, Magnus Dux Lithvaniæ, Ruffiæ Prussiæq; ac Culmensis, Elbingensis & Pomeraniæ Dominus & Hæres etc. Significamus tenore præsentium, quibus expedit, universis præsentibus & futuris, harum noticiam habituris, Quòd, dum post bellorum discrimina Terras nostras Prussiæ ad unitatem Domini nostri, à quo aliàs exciderant, favore divino recuperassemus, reperimus Magnificos, Strenuos, Generosos ac Nobiles Terrarum præfatarum Incolas multiplicibus ac diversis gaudere juribus, quorum quædam & legitimas negligebant successiones, ac justicias hominum perturbabant & involvebant, Sæpiusq; quod norma debebat esse justiciæ, litigiorum & seditionum erat occasio. Cui malo occurrere volentes, pulsati etiam precibus Ma-

gnificorum & Nobilium Palatinorum, Castellanorum, Dignitariorum, totiusque Communitatis & Baroniarum Terrarum nostrarum Prussiae, & signanter de districtibus Pomeraniae, Mariemburgeni & Stumeni, alias Pomezaniensis, omnia Jura Prutenicalia, Maydemburgeni, Pomeraniae ac feodalia, in quibus alias tempore Magistri & Ordinis consistebant, & ipsis regulabantur, ab ipsis remouentes, abrogantes, & perpetuo abolentes loco omnium Jurium praedictorum Unum Jus CULMENSE, quo districtus Culmenis gaudet & fruitur, ipsis & eorum posteris, juxta ejus veram naturam, substantiam, qualitatem & conditionem, de consensu omnium Praelatorum & Baronum nostrarum conferimus & largimur perpetuo & in aevum. Quo Jure judicari inter se debent & expediri, omnesque causas & controversias eorum, juxta tenorem Juris Culmenis praedicti, secundum quod in suis capitulis, punctis & consuetudinibus scriptum & declaratum existit, decident & determinabunt. Ab omnibus etiam oneribus ac daciis inconsuetis, quibuscumque appellentur nominibus, quas Magistro & Ordini de Bonis eorum dare cogebantur, ipsos libertamus. Abrenunciantes insuper devolutionem Bonorum hereditariorum, quae nobis & dominio nostro jure feodi cedebant & debebantur, ac ab eadem recedentes, successionem posteris eorum in perpetuum donantes. Hoc duntaxat pro nobis & Successoribus nostris excipiendo & reservando, quod quilibet Dignitarius & Terrigena Terrarum Prussiae ad bellicam expeditionem, quotiescumque necessitas exoptaverit illam per nos & successores nostros indici, in armis & equis decentibus, quilibet juxta continentiam Privilegii sui

fui & tenorem; aliàs qui careret Privilegio, secundum facultatem bonorum suorum servire erit & obligatus & obstrictus, prout & alii Incole Regni nostri ad hoc ipsum obligantur servitium. Prætereà volumus, ut omnes & singuli præfati subditi nostri in recognitionem Domini, prout etiam prius solitum erat, pro quolibet festo Sancti Martini denarium Culmeñ, vel loco ejus quinq; allenses Prutenicales, cum uno talento cæræ albæ nobis & Successoribus nostris ac Officialibus ad exigendum per nos deputatis, dent, solvant & consignent. Insuper volumus, quòd nullus Dignitariorum aut Terri- genarum in lacubus habeat, præter quod antiquitus habuit, tempore Magistri & Ordinis, neque etiam de illis lacubus se intromittat, quorum piscatura ad Magistrum & Ordinem pertinebat, Esto quòd Lacus prædicti hæreditates aliquorum contingant, vel eis contineantur. Harum, quibus Sigillum nostrum præsentibus est subap- pensum, testimonio Literarum. Actum in Castro no- stro Mariemburgeñ feria sexta proxima post festum San- cti Jacobi Apostoli, Anno Dñi Millesimo Quadringen- tesimo septuagesimo sexto, Præsentibus Reverendissi- mo ac Reverendis in Christo Patribus Dominis Jacobo S. Gnezneñ Ecclesiæ ArchiEpiscopo & Primate, Sbi- gneo Wladislavieñ & Regni Poloniae ViceCancellario, Vincentio Culmeñ Episcopis: necnon Magnificis, stren- uis & generosis Nicolao de Cuthno Lancicieñ, An- drea de Greczkow Inowladislavieñ, Stiborio de Bay- sen Mariemburgeñ, Ocha de Machwitz Pomeranie, Lu- dovico de Mortang Culmeñ, Palatinis: Joanne de Rythwian Sandomirien, & Regni Poloniae Marscalco, Joanne à Mor de Tharnow Woyniceñ, Joanne de Op-

porow Bresten, Nicolao de Ibidem Brzeszyne, Mat-
thia de Schlusow Cruschwitien, Nicolao Dambrowski
Culmen, Nicolao Feltsdorff Pomeraniae, Fabiano de
Legensdorff Elbingen, Castellanis, & aliis quampluri-
mis ad praemissa testibus fide dignis. Datum per ma-
nus Reverendi in Christo Patris Dni Sbignei Episcopi
Wladislavien & ViceCancellarii, necnon Venerabilis
Urielis de Gorka Gnesnen & Posnaniem Ecclesiarum,
Praepositi, Cancellarii Regni Poloniae, sincerè nobis di-
lectorum.

Sbigneus de Olechnycza
E. etc. manu propria.

CONFIRMATIO
D. CASIMIRI REGIS,
PRIVILEGIORVM, LIBERTATVM, ET
eorum omnium, quae diu & ab antiquo Or-
dines Terrarum Prussiae habue-
runt.

KASIMIRVS DEI gratia Rex Poloniae, Magnus
Dux Lithvaniae, Russiae, Prussiae q; Dominus & He-
res etc. Significamus tenore praesentium, quibus ex-
pedit, universis, Quod, quemadmodum anteaetis annis
certa Privilegia & Libertates subditis nostris & Terraru
nostrarum Prussiae Incolis, tam Spiritualibus quam Se-
cularibus dederamus & concesseramus, Quae quidem
Privilegia, & alia, diu & ab antiquo per eos tenta &
habi-

habita, ipsis subditis nostris in omnibus punctis, conditionibus, Articulis & Clausulis tenere & observare, promittimus presentibus & pollicemur. Harum, quibus Sigillum nostrum est subappensum, testimonio Literarum. Datum in Nova Civitate Corczin feria sexta proxima post festum Sancti Barnabae Apostoli, Anno Domini Millesimo, Quadringentesimo, septuagesimo septimo. 13/6

Relatio Venerabilis Stanislai de Curozwanki
R. P. ViceCancellarii.

Stanislaus ViceCan. sff.

CONFIRMATIO
D. JOANNIS-ALBERTI
REGIS, OMNIUM JURIIUM ET PRIVILEGIORUM Terrarum Prussiae.

IN Nomine DOMINI. Amen. Ad perpetuam rei memoriam. Quoniam humani generis actiones memoriae perpetuae indigentes, plerumque ab hominum noticia dilabuntur, nisi scripturarum seu testium munimine fuerint roboratae: Proinde Nos JOANNES-ALBERTUS Dei Gratia Rex Poloniae, necnon Terrarum Cracoviae, Sandomiriae, Siradiae, Lanciciae, Cujaviae; Supremus Dux Lithvaniae, Russiae, Prussiaeque ac Culmen, Elbingen & Pomeraniae Dominus & Haeres etc. Significamus tenore presentium, quibus expedit, universis presentibus & futuris, harum noticiam habituris, Quomodo revolyentes in animo, qua quantas

taq; puritatis affectione & integre fidei constantia Pre-
 lati tam Spirituales quam Seculares, Comites, Barones,
 Milites, Proceres, Nobiles, Communitatesque Civita-
 tum & Oppidorum, ceteriq; Subditi & Incolę Terra-
 rum Prusie, tam Spirituales quam Seculares, personam
 nostram venerati sunt atq; dilexerunt, ut tandem de-
 cedente foelicis memorie Sereniss. Principe Domino
 CASIMIRO, etc. Genitore & Predecessore nostro cha-
 rissimo, nos tanquam verum heredem & legitimum suc-
 cessorem, ipsis in Regem & Dominum concordibus vo-
 luntatibus una cum aliis Regni nostri Consiliariis, Di-
 gnitariis, Officialibus & cujuscunq; Status Conditio-
 nisq; Subditis & Incolis elegerunt & assumpserunt, Sa-
 croq; Regni Diademate insigniverunt. Cum igitur,
 Altissimo dirigente, votis eorundem Incolarum Regni
 nostri in nostram Majestatem deliberate concurrenti-
 bus, Paternum Sacri Regni Polonie nacti sumus solium,
 Dignum ea propter duximus in ipsos Subditos Incolasq;
 oculos pietatis nostre aperire, & eis hanc, quam actu
 & opere, veluti Athlete fideles, in nos exhibuerunt, syn-
 ceritatem & constantiam, gratitudine nostra, ut decet,
 compensare. Unde ex certa nostra scientia, preha-
 bitaque sufficienti deliberatione, animo benevolo &
 voluntate nostra ultronea ipsis Prelatis, Comitibus, Ba-
 ronibus, Dignitariis, Officialibus, Militibus, Proce-
 ribus, Nobilibus, Civitatibus & earundem Communi-
 tatibus, ceterisq; Subditis & Incolis Terrarum Prusie,
 cujuscunq; Status conditionisque existant, queq; ipso-
 rum Jura & Privilegia, tam Ecclesiastica quam Secula-
 ria, quecunq; a dive memorie Regibus Polonie, & ab
 olim Genitore & predecessibus nostris, super quibus-
 cunq;

cunq; Bonis & Libertatibus habere dignoscuntur & ha-
 bent, sub quibuscunq; Datis, in vita ipsorum emana-
 tas & concessas, emanataq; & concessa Jura & Privile-
 gia in se continentes, in omnibus earum Positionibus,
 Conditionibus, Articulis universis ratificamus, gratifi-
 camus, approbamus, & presentium Literarum patrocini-
 o confirmamus, Decernentes easdem eademque robur
 habere perpetuæ firmitatis: Promittentes insuper in
 verbo nostro Regio, & tenore presentium spondentes,
 eadem ipsorum Jura, Libertates & Privilegia per omnia
 rata grata habere, & inconcussè, jugiter, inviolabiliter
 & perpetuò, Justicia mediante, gratiosè conservare.
 In cujus rei testimonium, Sigillum nostrum presentibus
 est appensum. Datum in Thorundie Sabbato in Vi-
 gilia Sancti Andreæ Apostoli, Anno Dñi Millesimo,
 Quadringentesimo, nonagesimo quarto, Regni verò
 nostri anno tertio. Presentibus Reveren in Christo Pa-
 tribus Dominis Creslao de Curozwanki electo confir-
 mato Wladislavien & Regni nostri Cancellario, Urie-
 le Posnaniën & Luca Varmien Episcopis; necnon Ma-
 gnificis, Generosis & Nobilibus Ambrosio Pampowsky
 Siradiense, Matthia de Sluzewo Bresten, Nicolao de
 Bayfen Mariemburgen, Carolo de Felden Culmen, Ni-
 colao de Wolikow Pomeraniæ, Palatinis. Nicolao
 de Strzewow Wislicien, Joanne de Przithik Rado-
 mien, Petro Miskowsky Rosperien, Nicolao Gar-
 dzina de Ludbranz Spiczmurien Castellanis. Petro
 Kmitha de Wissnycze Regni nostri, Raphaële de Le-
 schno Curia nostræ Marscalcis, cæterisque Dignitariis,
 Consiliariis & Curiensibus nostris fide dignis Testibus.
 Datum per manus Venerabilis Gregorii de Ludbranz

40

Scarbmuriensis, & Sancti Floriani in Cleparz Ecclesiarum Præpositi, Regni nostri ViceCancellarii, syncerè nobis dilecti. G. ViceCancellarius ffl. Relatio ejusdem Venerabilis Gregorii de Ludbranz R. P. ViceCancellarii.

PRIVILEGIUM
CAPITULI VARMIE-
SIS SUPER ELECTIONE EPISCOPO-
rum Varmieñ, & gratitudine personæ eligendæ,
& quòd ex electis R. E. X nominare non debe-
at nisi verum Terrarum Prussia Indi-
genam.

IN Nomine DOMINI, Amen. Ad perpetuam rei memoriam. Nos SIGISMUNDUS Dei gratia Rex Poloniæ, Magnus Dux Lithvaniæ, necnon Terrarum, Cracoviæ, Sandomiriæ, Siradiæ, Cujaviæ, Ruffiæ, Pruffiæ ac Culmen, Elbingen Pomeraniæq; etc. Dominus & Hæres, Significamus tenore præsentium, quibus expedit, universis & singulis, præsentibus & futuris, harum noticiam habituris, Quòd, cum defuncto bonæ memoriæ olim Reverendo in Christo Patre D. Luca Epò Varmieñ, ejusdem Ecclesiæ Prælati & Canonici ad electionem novi Epì & Pastoris processissent, fuissetq; orta aliqualis controversia super eadem electione, quæ videbatur nobis facta non observato tenore cujusdam Articuli, inter olim Serenissimum Principem Dominum

KAS-

KASIMIRUM Regem Poloniae Genitorem nostrum charissimum, & Reverentem Patrem D. NICOLAUUM Episcopum Varmienem & ejus Capitulum per quandam inscriptionem facti, in quo cavetur, quod iidem Praelati & Canonici Ecclesiae Varmienem, defuncto eorum Episcopo, personam gratam Regibus Poloniae eligere teneantur, Cumque ejusdem Articuli, de eligenda grata Regibus persona, interpretatio in dubium hincinde traheretur: Nos prospicere cupientes, ne qua posthac controversiae occasio inter nos vel Successores nostros Reges & Dominum Episcopum, ac ejus Capitulum dictae Ecclesiae Varmienem super electione Episcoporum, & gratitudine personae eligendae, exoriri possit, Ad tollendam omnem ejusdem Articuli in posterum ambiguitatem, matura deliberatione & consultatione cum Consiliariis nostris Spiritualibus & Secularibus habita: cum Reverendo Patre Dño FABIANO Episcopo Varmiense moderno, ac ejus Ecclesiae Capitulo in hunc, qui sequitur, modum devenimus, Quod, cum contigerit vacare Ecclesiam Varmienem, Praelati & Canonici ejusdem Ecclesiae tempestive & ante Electionem novi Episcopi mittere tenebuntur de gremio sui Nuncios ad nos & Successores nostros legitimos Reges Poloniae, si fuerimus aut iidem successores nostri fuerint in Polonia, non tamen in terris Russiae, aut Magno Ducatu Lithvaniae, usque Vilnam & non ulterius, Et significare per eosdem nuncios suos obitum, sui Episcopi, & diem Electioni novi Pastoris praefinitum. Et praeterea dicere tenebuntur nomina omnium Praelatorum & Canonicorum Ecclesiae suae, praesentium & absentium ab Ecclesia, ac declarare pro eorum iudicio fideliter ac veraciter vitam, mores, dignitatem, genus &

nus & omnem conditionem status uniuscujusq;. Quod
 si forsan pro eo tempore Nos aut nostri Successores non
 essemus seu non essent in Polonia, sed in Terris Rus-
 siæ aut ultra essemus, seu Successores nostri essent in Ma-
 gno Ducatu Lithvaniæ ultra Vilnam, Tunc iidem Præ-
 lati & Canonici, ne fortè Electio nimis tardetur, & Ec-
 clesia præfata alicui periculo aut incommodo subji-
 tur: Obligati erunt per suos Nuncios omnia superius de-
 scripta Reverendissimo Domino Archiepiscopo Gne-
 sneri pro tempore existenti, aut ejus Paternitate extra
 suam provinciam existente, Vladislavien aut Plocen
 Episcopo significare; Qui quidem Dominus Archiepi-
 scopus, sive alter ex suprædictis Episcopis, illo absente,
 sine omni mora per suum tabellarium sive nuncium de il-
 lis omnibus, quæ sic significabuntur, nos & successores
 nostros curabit reddere certiores. Ex quibus qui-
 dem Prælati & Canonicis ejusdem Ecclesiæ nos quatu-
 or pro arbitrio nostro nominabimus, non alios tamen,
 quam qui sint veri Terrarum Prussiarum Indigenæ, ac per
 specialem nuncium nostrum seu literas clausas significa-
 bimus ipsi Capitulo, quos judicaverimus ad illius cul-
 men dignitatis & locum in Consilio nostro magis ido-
 neos & nobis gratos. Ipsi verò Prælati & Canonici
 prædicti unum ex illis quatuor, quem voluerint aut ju-
 dicaverint meliorem & utiliore, deligere in Episco-
 pum tenebuntur & erunt asscripti. Et quia ex longa
 mora Electionis aliqua difficultas vel impedimentum
 evenire poterit, Itaq; post acceptum de morte Episcopi
 à Capitulo nuncium, suprædictos quatuor Octo dierum
 ad summum spacio nominare debemus. Et hoc am-
 plius adjiciendum, ipso Domino FABIANO Episcopo, &
 ejus

ejus Ecclesiæ Varmien Capitulo assentientibus, volui-
 mus, Quòd si quando nos vel successores nostri filium
 sive fratrem germanum inter quatuor supradictos nomi-
 nare vellemus, qui prius esset de gremio Capituli Eccle-
 siæ prædictæ, id in nostro & Successorum nostrorum,
 Regum Poloniæ arbitrio & potestate erit, ac si iidem fi-
 lius vel frater Terrarum Prusis Indigena esset. Cum
 autem dicti Prælati & Canonici, sic ut præfertur, unum
 ex eisdem quatuor nominatis elegerint, intimare de-
 bebunt nobis & successoribus nostris novum electum,
 & cum eo supplicare, ut illum nostris literis Sedi Apo-
 stolicæ & Sanctissimo Domino commendemus, ut Ele-
 ctionem de eo factam cum gratia confirmare dignetur.
 Qua quidem Confirmatione & provisione secuta, idem
 Electus, juxta tenorem & inscriptionem, cum superius
 nominato olim Domino NICOLAO Episcopo Varmi-
 ensi & ejus Capitulo factam, præstabit juramentum no-
 bis & successoribus nostris, prout in eadem inscriptione
 latius continetur. Reliqua verò, quæ in eisdem Ar-
 ticulis cum supradicto Domino NICOLAO Episcopo
 Varmien habitis continentur, Salva & integra perman-
 nere debent in perpetuum & inviolabiliter observanda.
 Ea verò, quæ his Literis continentur, ipse Dominus
 FABIANUS Epus Varmien prædictus, cum Capitulo
 Ecclesiæ firmiter, illesè & inconcusè tenere, exequi &
 inviolabiliter perpetuò observare debebit, & ejus suc-
 cessores debebunt. In quorum omnium & singulorum fi-
 dem & testimonium præmissorum præsentis literas scribi
 fecimus, & Sigillo nostro communiri. Actum in Con-
 ventione Generali Piotrkovien Die Martis septima
 Mensis Decembris, aliàs in Vigilia Conceptionis bea-

tissimæ Virginis Mariæ, Anno Domini Millesimo, quingentesimo, duodecimo, Regni verò nostri sexto. Præsentibus Reverendissimo & Reverendis in Christo Patribus Dominis Joanne ArchiEpiscopo Gnesneñ & Primate, Joanne Cracovieñ, Joanne Posnaniëñ, Erasmo Ploceñ, Fabiano Varmieñ, Matthia Præmisliëñ & Regni nostri Cancellario, Jacobo Camenecëñ Ecclesiarum Episcopis; necnon Magnificis, Venerabilibus, Generosis & Nobilibus Nicolao de Camienycz Cracovien-
se, & Campiductore Regni nostri generali, Nicolao de Ludbrancz Posnaniëñ, & Capitaneo Lancicieñ, Joanne de Tarnow Sandomiriense, Jaroslao de Lasko Siradiëñ, Joanne Jarandi de Brudzew Lancicieñ, Nicolao de Grethkow Brestense, Joanne Odrovvansch de Sprovva, Rursiæ Terrarum Generali, Otha de Chodecz Podoliæ, Nicolao Firley de Dambrovvicza Lublinieñ, Georgio de Bayfen Marienburgense, Nicolao de Pilcza Belzense, Andrea de Radzieowicza Plocense, & Ravense, Capitaneo, Prandota de Zelafna Ravense, Palatinis. Luca de Gorka Posnaniense & Capitaneo Majoris Poloniæ generali, Christophoro de Schidlowiecz Sandomiriense & Regni nostri ViceCancellario, necnon Siradiense, Sochaczoviense & Gostineñ Capitaneo, Stanislao de Ostrorog Calisiense, Janusio Latafski Gnesnense, Joanne de Przeremb Siradiëñ, Alberto de Gladczianow Lanciciense, Nicolao de Schiedlovicz Radomiëñ & Succamerario Cracovieñ, Regniq; nostri Incifore, Nicolao Jordan de Zacliczin Vislicieñ, Andrea de Oporovv Brestense, Jeronymo de Cobilany Rosperien-
se, Andrea de Tanczin Bięcense, & Causarum, Curie nostræ Referendario, Georgio Krupski de Orchovv Belzense, Stanislao de Pothulice Miedzi-

rzecense, Jaroslao Sokolovvski de Wrancza Landense, Petro Gorski Naklente, Joanne de Bochothnicza Malegostenfe, Stanislao de Sprowa Zarnoviense, Martino Skethmitzki de Bogoria Zawichosten, Stanislao Kuropathva de Lazuchow Chelmen, Castellanis. Stanislao de Chodetz Marschalco & Capitaneo Leopoliens, Andrea de Cosczieletz Thesaurario, Scepusiens, Ofwiczimense, Sandecense, Junivvladislaviense, & Bidgostiens Capitaneo, necnon Zuppario & Magno Procuratore Generali Cracoviense, Regni nostri, Andrea de Klecz Custode, & Joanne Sculteti Sacrae Theologiae Professore ac Archidiacono Varmien, Joanne Latalski Gnesnense, Cracoviense & Lanciense Praeposito, Petro Thomiczki Decretorum Doctore, Archidiacono, Joanne Carnkowski Canonico Cracoviens, Stanislao Goretzki Praeposito Califfchien Ecclesiarum, Secretariis nostris; Stanislao Jaroczki Marschalko Curiae nostrae, Raphaële de Leschno Capitaneo Szlochovien, Henrico Itfeld Proconsule Thorunen, Ambrosio Storm Nuncio & Notario Gedanen Civitatum nostrarum. Adamo de Drzevvicza Sandomiriens, Stanislao Lassoczki Pofnaniens Terrarum Succamerariis, Nicolao Oczieski Capitaneo Costense & Magistro agasonum Curiae nostrae, & aliis quampluribus Dignitariis, Officialibus & Curien nostris, circa praemissa testibus fide dignis, sincerè & fidelibus nostris dilectis. Datum per manus praefati Reverendi in Christo Patris Domini Matthiae Episcopi Praemisliens, & Regni nostri Cancellarii, sincerè nobis dilecti. Matthias Dominus Episcopus & Cancellarius ssp. Relatio ejusdem Reverendi in Christo Patris Domini Matthiae Episcopi Praemisliens & Regni Poloniae Cancellarii.

CAU-

46

CAUTIO D. SIGIS-
MUNDI REGIS IN

PERSONA JOANNIS BALINSKI,
*quod posthac non nisi Terrarum Prussiae Indigena, &
Vernacula Linguae peritus, in ipsarum Terra-
rum Consilium recipi & admitti
debeat.*

SIGISMUNDUS Dei gratia Rex Poloniae, Ma-
gnus Dux Lithvaniae, Russiae, Prussiaeque etc. Domi-
nus & haeres, Manifestum facimus tenore praesentium,
universis & singulis, quibus expedit, Quod, cum alias
nos volentes generosum & fidelem nobis dilectum Joan-
nem Balinski, ob meritorum suorum exigentiam, am-
plioribus honorum fastigiis evehere, ei Castellanus Ge-
daneum Dignitatem in Terris Prussiae ea vice contulisse-
mus, mandavimus eum in ipsarum Terrarum Consilio
recipi & admitti. Verum, cum praemissa Privilegiis
earundem Terrarum obsistere dicantur, ex eo quod
idem Joannes Indigena illarum Terrarum non existens,
ipsarum etiam Linguae imperitus, praesenti nostro De-
creto declaramus, & in verbo nostro Regio affirmamus,
intentionis nostrae non fuisse nec esse, per praedictam
nostram collationem & mandatum memoratis Privilegi-
is aliquatenus derogare, aut quomodolibet ea tollere vel
abrogare. Decernimus igitur, praedictam nostram collatio-
nem & Mandatum, quatenus dictis Privilegiis aliquomo-
do adversetur, Terris nostris Prussiae in aliquo non preju-
dicare,

dicare, aut ad similia permittenda in consequentiam seu exemplum in posterum trahi non posse neq; debere, Dictosq; Terrarum Prussiae Consiliarios eundem Joannem in Consilium recipiē nostroq; Mandato pareū, ab hujusmodi Privilegiis recessisse censi aut judicari à quocumque non debere neq; posse, nolentes eos aut Terras prædictas, ob nostræ complacentiæ obsequia, hac duntaxat vice nobis impensa, præjudicium aliquod aut jacturam reportare. In quorum omnium testimonium has nostras Literas fieri jussimus nostro Sigillo communitas. Datum in Brzeszcze Kujaviē feria quarta ipso die Beati Andreae Apostoli: Annorum Domini Millefimo, Quingentesimo, decimonono, Regni autem nostri tredecimo.

Christophorus de S. Palatinus & C.
Cracoviē ac R. P. Cancellaria: ffr.

Ad Relationem Magnifici Christophori de Schidlowicz Palatini & Generalis Cracoviensis ac Regni Poloniae Cancellarii etc.

CONFIRMATIO
D. SIGISMUNDI RE-
GIS, OMNIUM PRIVILEGIORUM ET
Libertatum, quas D. ejus Genitor CASI-
MIRUS REX Terris Prussiae
concesserat.

IN Dei nomine, Amen. Ad perpetuam rei memoria.
riam. Omnium rerum, quæ sempiternæ memoriæ
G commen-

commendari debent, nulla certior firmitudo inveniri potest, quàm ut literis posteritati mandentur. Cætera enim facta, quantumvis memorabilia, aliis modis æternitati dicata, aliquot quidem sæculis durare possunt, sed quæ literis memoriæ conservantur, nunquam intereunt, ipsaq; vetustate fiunt augustiora. Atq; ita Nos SIGISMUNDUS Dei gratia Rex Poloniae, Magnus Dux Lithvaniae, Russiae, Prussiae, Culmen, Elbingen, Pomeraniae; etc. Dominus & Haeres, Manifestum facimus his literis nostris universis & singulis tam praesentibus quàm futuris, Quod accedentes ad conspectum nostrum Domini Praelati Terrarum nostrarum Prussiae, Spirituales & Seculares, Barones & Nobiles, principalem Civitatum nostrarum, videlicet Thorunen, Elbingen & Gedanensis Proconsules & Consules, ac apud nos earundem Civitatum nominibus nuntii, sincere & fideles nostri dilecti: Inter cætera nobis humiliter supplicarunt, ut eos circa jura, libertates, prerogativas, concessiones, donationes, & exemptiones, per clarissimæ memoriæ Dominum CASIMIRUM Regem Parentem nostrum desideratissimum concessa & concessas, conservare, manutenere, tueri & defendere, ac ea & illas confirmare, approbare, ratificare, laudare ac demum renovare dignaremur. Nos igitur SIGISMUNDUS Rex suprascriptus, qui naturæ benignitatisq; nostræ instituto ea, quæ ad ornamentum, dignitatem, amplitudinem atque conservationem Dominiorum & Subditorum, quibus divina dispensatione sumus praefecti, spectare nobis videntur, grati libentissimiq; concedimus, ac praesertim cum ipsi Domini Praelati & Barones, & tota ferme Nobilitas, & supradictarum Civitatum Cives, & alii

& alii multi Incolæ & Subditi nostri, quamvis semper
 antea, ut sub imperium & protectionem divi parentis
 nostri CASIMIRI redierunt, nunc tamen maximè, cum
 hoc bellum, quod nuper cum Illustri Domino Alberto
 Marchione Brandeburgensium cum Magistro Ordinis S.
 Mariæ in Prussia gessimus, eorundem Subditorum no-
 strorum propulsam damna, cædes & injurias, constan-
 tissimi & integerrimi nobiscum perferentes manserunt.
 Auditis itaq; & benè intellectis hodiè superscriptis Pri-
 vilegiis & Juribus ac Prærogatiuis, concessionibus aut
 donationibus, ad laudem & gloriam in primis Dei Opt.
 Max. omniumque Sanctorum ejus, & ad universarum
 Terrarum nostrarum Prussia incrementum, tranquillita-
 tem, quietem, stabilitatem atq; conservationem, su-
 prascripta Privilegia ac Jura, Prærogativas, concessio-
 nes, donationes & exemptiones, ac omnia & singula
 in ipsis contenta, cum omnibus & singulis eorum pun-
 ctis, clausulis & continentiis, prout jacent, ex certa no-
 stra scientia & voluntate, ex consilioq; Consiliariorum
 nostrorum ad præsens in hoc novissimo Conventu no-
 biscum existentium, pro solita benignitate nostra Re-
 gia, approbamus, ratificamus, renovamus & accepta-
 mus, laudamus & confirmamus, ipsaq; & ipsas perpetuum
 firmitudinis robur obtinere volumus. Promit-
 tentes in verbo nostro regio, ac sub fide boni, legalis &
 ingenui Principis, pro nobis & successoribus nostris, nos
 omnia superscripta in præinfertis Privilegiis expressa fir-
 miter & inviolabiliter observare, tenore præsentium
 mediante. In cujus rei testimonium Sigillum nostrum
 præsentibus appendi jussimus, & ad meliorem cautelam
 nos manu nostra propria subscripsimus. Actum &

19/4

Datum in Civitate nostra Thorunensi, feria sexta proxima ante Dominicam jubilate, Anno Domini Millesimo, Quingentesimo, vigesimo primo, Regni verò nostri Anno decimoquinto. Presentibus Reverendiss. & Reverentiss. in Christo Patribus Dominis Joanne de Lasco Archiepiscopo Gnesnens. & Primate, & Sedis Apostolicę Legato nato, Matthia de Drewicza Wladislavien. Episcopo, Raphaële de Leschno Ecclesię Premisliens. & Laurentio Miedzilesky Ecclesię Camenicens. designatis & electis Episcopis. Necnon Magnificis Nicolao de Dambrovicza Castellano Cracoviens. & Regni nostri Campiductore supremo, Christoffero de Schidlovicz Palatino & Capitaneo Cracoviensi ac Regni nostri Cancellario etc. Joanne de Lubranicz Posnaniens. Joanne de Calinovva Calicens. Stanislae de Kosciolecz Brescens. & Capitaneo Marięburgens. Palatinis. Luca de Gorka Posnaniens. & Majoris Polonię Capitaneo Generali. Nicolao de Schidlovicz Sandomiriens. & Regni nostri Thesaurario. Joanne Wiethvinski & in Carnischin Plocensi, Stanislae de Sprovva Sarnovvieni Castellani, Ac Venerabilibus Joanne Latalsky Gnesnens. Cracoviens. ac Lanciciens. Ecclesiarum Preposito. Andrea Sloriczki Preposito S. Floriani in Kleparz extra muros Civitatis nostrę Cracoviens. & Custode Sandomiriens. Nicolao Oleschniczky Canonico Cracoviensi, Paulo Grasslovvski Preposito omnium Sanctorum in Cracovia, & aliis quampluribus Dignitariis, Officialibus & Curiensibus nostris ad premissa testibus fide dignis syncerę & fidelibus dilectis. Datum per manus prelati Magnifici Christoffori de Schidlovicz in Smielow & magna Opatow Palatini
& Ca.

& Capitanei Cracoviensium ac Regni Poloniae Cancellarii,
tum Siradiensium, Sochaczoviensium, Costinensium etc. Capitanei,
sincerè nobis dilecti.

SIGISMUNDUS REX spt.

Christoff. d S. Pal & Capitaneus
Cracoviensium ac R. P. Can. spt.

D. SIGISMUNDI REGIS LITERÆ, QUI-

BUS ORDINIBUS TERRARUM PRUSSIAE, QUI VI-
gore Privilegii ad Electionem Filij vocati non fue-
runt, postea tamen Electionem ratam habuerunt,
cavet, quòd ea prateritio illis fraudi esse non debeat,
Et specialiter obligat Sigismundum Augustum Fili-
um, ut annum decimum quintum egressus, pro more
Antecessorum, juret se Privilegia & Indulta tam
publice quàm privatim conservaturum, Et quamdiu
hoc ipsum Juramentum non præstiterit, Ordines etiam
Terrarum & Civitatum ad servandum suum Jura-
mentum Majestati ejus præstitum asstrictos esse non
debere, Sed ubi Majestas ejus satisfecerit,
tum demum omnem fidelitatem &
obedientiam præstare
oportere.

SIGISMUNDUS Dei gratia Rex Poloniae, Magnus
Dux Lithvaniae, Russiae, totiusq; Prussiae ac Maso-
viae

vite etc. Dominus & Hæres, Manifestum facimus universis, Quia licet Privilegia & Libertates Statibus & Ordinibus Terrarum Nostrarum Prussiae, tam Ecclesiasticis quàm Secularibus, à Majoribus nostris concessa & concessæ, ac per nos confirmata & confirmatæ, inter alia id potissimum contineant, ut dicti Ordines & Status Prussiae ad futurorum Regum Poloniae, quotiescunq; super Electione & Coronatione illorum deliberationem fieri contingat, ad Electionem & Coronationem, vocari & admitti debeant. Quia tamen in eligendo Sereniss. Principe Domino SIGISMUNDO Secundo, Rege Poloniae & Magno Duce Lithvaniae, Filio nostro charissimo hoc ipsum prætermisum est, non data quidem opera, sed quòd nobis viventibus & Regno nondum vacante, magisq; divina ordinatione, quàm humano consilio, Electio ipsa Majestatis suæ contigit: Considerantes tantam prædictorum Statuum & Ordinum Terrarum nostrarum Prussiae, erga nos & Serenissimam familiam nostram, fidem, affectum & observantiam, ut hanc ipsam Electionem Serenissimi filii nostri, præter vocationem eorum factam, approbaverint, & similiter ipsum eligendo ratam atque gratam habuerint: Nolentesq; , ut per hujusmodi Electionem, ad quam vocati non erant, aliquid in posterum Privilegiis & Libertatibus dictorum Statuum & Ordinum earundem Terrarum nostrarum Prussiae derogaretur: Decernimus, ut deinceps, quotiescunq; Regem decedere, & Regnum vacare aut Electionem quomodocunq; celebrari contigerit, Domini Consilarii Ordinis utriusq; Regni Poloniae, antequam ad Electionem procedant, prius prædictos Status & Ordines Terrarum Prussiae de hac ipsa novi Regis
Electio-

Electione certiores faciant, ac eosdem ipsos Status, se-
 cundum antiquam consuetudinem & contenta Privile-
 giorum eorum, ad eam vocent & admittant. Vo-
 lentes præterea, pro tanta eorum in nos & Filium no-
 strum charissimum integritate, vicissim eis providere,
 ut & ipsi in suis Juribus & Privilegiis ac Libertatibus
 Consuetudinibusq; approbatis absq; ullo conservaren-
 tur detrimento, pollicemur illis præsentibus literis no-
 stris, Quòd quandocunq; ipse Serenissimus filius noster,
 post mortem nostram, ad ætatem legitimam, nempe,
 ad annos quindecim completos, perveniens, possessionem
 Regni & Dominiorum nostrorum adire voluerit,
 tenebitur illis id totum præstare, quod Antecessores no-
 stri Reges Poloniae & nos ipsi præstitimus ex debito, ad
 quod ejus Majestatem, ut Filium & Successorem no-
 strum, tenore præsentium obligamus, videlicet, quòd
 jurare debet omnia Jura, Libertates & Privilegia,
 Literas Immunitatesve earundem Terrarum Prussiae,
 tam Ecclesiasticas quàm Seculares, Ecclesiis, tum ipsis
 Terris, earundemq; Prælati, Baronibus, Nobilibus,
 Civibus, Incolis & quibuslibet personis, cujuscunque
 status & conditionis existentibus, per Divos prædecef-
 sores nostros Principes tam Spirituales quàm Seculares
 Reges & Dominos Terrarum prædictarum justè & legi-
 timè donatas & concessas, & per nosmetipsos confir-
 matas manutenere, servare, custodire & attendere,
 in omnibus conditionibus atq; punctis, Et omnia illicitè
 ab eisdem Terris alienata aut distracta, pro posse suo,
 ad proprietatem earundem Terrarum recuperare: Ter-
 minos etiam earum non minuere, sed pro virili defen-
 dere & dilatare.

Et quamdiu hoc ipsum Juramen-
 tum

44
tum Mtās sua non præstiterit, & huic debito suo Re-
gio non satisfecerit, Ipsi universi Status & Ordines ea-
rundem Terrarum & Civitatum nostrarum Prussiae ad
servandum Juramentum suum, quod Majestati suae præ-
stiterunt, non erunt allstricti neq; obligati. Verum,
quandocunque post mortem nostram supradictis omni-
bus idem Serenissimus Filius noster, in ætate legitima,
existens, satisfecerit, & hujusmodi Juramentum debi-
tum præstiterit, universi earundem Terrarum nostra-
rum Prussiae Status & Ordines Subditi nostri, Illi ut ve-
ro & legitimo Domino & Regi suo coronato omnem fi-
delitatem & obedientiam obsequiaq; secundum Jura-
mentum à se illi factum, præstare & exhibere tenebun-
tur. In cujus rei testimonium, Sigillum nostrum præ-
sentibus est appensum. Datum in Conventu Generali
Cracoviensi, feria sexta ante Dominicam Judica proxi-
ma, Anno Domini Millesimo, Quingentesimo, trige-
simo, Regni verò nostri vigesimo quarto.

Christofferus de S. Castel. & Capit.
Cracoviens ac R. P. Cancel. ff.

LITERÆ D. SIGIS-
MUNDI REGIS, QUI-
BUS POST PRÆSTITUM JUSJU-
randum Filii, solenniter iterum cavet universis Sub-
ditis, ejus Majestati neminem parere debere, nec im-
perio obnoxios fore, nisi prius omnia Jura, Privilegia
& Libertates Diplomate suo confirmaverit, &
juxta ejus tenorem in executionem
posuerit.

SIGIS-

SIGISMUNDUS ejus nominis Primus Dei gratia
 Rex Poloniae, Magnus Dux Lithvaniae, Russiae, Ma-
 soviae etc. Dominus & Haeres, Significamus tenore pre-
 sentium universis & singulis cujuslibet ordinis, digni-
 tatis & conditionis hominibus, Quum ante septem an-
 nos Consiliarii Regni nostri, singulari erga nos Do-
 mumq; nostram Regiam studio & propensione permoti,
 tum imminentibus etiam difficultatibus atq; motibus,
 quibus nunc universus ferè Orbis terrarum tumultuatur,
 obviam ituri, Serenissimum filium nostrum **SIGISMUN-**
DUM AUGUSTUM Regem sibi & Regno Poloniae, no-
 bisq; Successorem voluntate nostra constituissent, Ac
 ne res ea posthac ullo pacto in dubium revocari posset,
 Jurejurando sigillatim dato fidem suam ipsius Majestati
 obstrinxissent, quoniam is tum per aetatem nondum
 commodè vicissim ipsis Jusjurandum dare poterat, re-
 cepimus nos & spopondimus, & Regio verbo nostro
 promissimus, ipsius Majestatem, cum annum quincum-
 decimum egressa fuisset, vicissim Subditis suis omnibus
 consentaneum Jusjurandum esse daturam, cujus for-
 mula continetur iis literis, quibus fidem tum nostram ob-
 strinxeramus. Nunc itaq; cum tempus id venisset,
 liberavit ipsius Mtās fidem nostram pro se datam, taleq;
 Jusjurandum, quale modò descriptum est, conceptis
 verbis ad Sancta Dei Evangelia publicè in Ecclesia Ca-
 thedrali Cracovien̄ quarta die Februarii praesentis anni
 dedit. At ne quid ea res discriminis maliq; affer-
 ret, ita tum quoq; in Electione illa cautum publicoque
 omnium consensu constitutum erat, ut, quoad nos vive-
 remus, penes nos universa potestas & Regium imperi-
 um nihilominus maneret: Nunc etiam recepit idem Se-
 H renis.

reniss. Filius noster, spondit & regio suo verbo promisit, literarumq; monimentis ea de re conscriptis & signo suo consignatis cavet, viventibus nobis nihil se potestatis & jurisdictionis in Regno Poloniae sibi esse vendicaturum, neq; vi quenquam invitum ad jussa sua faciendum adacturum, sed omnia, seq; ipsum denique semper in potestate nostra fore. Deinde quaecunq; jurasset publicè, omnia se sine ulla controversia servaturum, defensurum atq; executurum esse. Postremò, post obitum quoque nostrum, neminem prædictorum, Subditorum suorum sibi parère debere, nec fore obnoxios fidei imperioq; suo, nisi priùs ipsis universa Jura, Privilegia, Libertates, Literas & Immunitates, à supramemoratis Majoribus suis Divis Regibus Poloniae, & à nobis etiam concessas ac donatas, quæq; in posterum, dum vivimus, à nobis concedentur donabunturq;, Diplomate suo Regio confirmaverit, & pro viribus suis juxta tenores earundem in executionem posuerit. Quæ omnia nos quoq; pro eodem Serenissimo filio nostro recipimus, spondemus & Regio verbo nostro promittimus. Id quod his literis signo nostro impresso consignatis testatum esse volumus. Datum Cracoviae sexta Februarii Anno Domini Millesimo, Quingentesimo, trigesimo septimo, Regni verò nostri Anno trigesimo primo.

CON-

57

CONSTITUTIONES TERRARUM PRUS- SIÆ, IN PUBLICIS COMITIIS THORU- NII *conciliata*, & D. SIGISMUNDI *Regis autoritate pro commodo publico* *confirmata.*

SIGISMUNDUS Dei gratia Rex Poloniae, Magnus Dux Lithvaniae, Russiae totiusque Prussiae, Masoviae etc. Dominus & Haeres, Significamus tenore praesentium, quibus expedit, universis praesentibus & futuris harum noticiam habituris, Quia consulere volentes multiplicibus erroribus & abusibus, qui cum in divinis ac etiam humanis rebus inoleverant in Terris & Civitatibus nostris Prussiae, ac bonae Reformationi defectuum & dissidiorum, quae in ipsis Terris oborta fuerant, utiliter intendentes, de consilio & consensu omnium Consiliariorum & Nunciorum Communitatis, tam Militaris quam etiam Civilis Ordinis, infra scriptas Constitutiones edidimus, promulgavimus & confirmavimus.

In primis, quisque Palatinus habeat apud se exemplum seu copiam Privilegii Terrarum Prussiae, & illud unicuique petenti ostendet, & coram eo legi faciet, quod nos manutenere, & secundum ipsius tenorem tam Spiritualium quam Secularium Dignitates, Officia & Capitaneatus solis & propriis Terrarum Prussiae Indigenis conferemus.

Judicia Terrestria in singulis Palatinatibus quotannis bis serventur, ita ut in Palatinatu Culmensi Primum Judicium feria tertia post Dominicam Quasi modò geniti, Secundum autem feria tertia post Lamperti celebretur. In aliis autem Palatinatibus juxta veterem consuetudinem observetur. Ex quibus quidem Judiciis Terrestribus Appellationes ordinariæ fiant ad Conventus Generales Terrarum Prusiæ; A Conventibus autem Generalibus ad Regium Tribunal nostrum, donec alterutra partium tres conformes sententias obtinuerit.

Ut autem frivola & temeraria Appellationes non nihil cohibeantur, quisquis in Judicio Terrestri ad Conventum generalem appellaverit, tres Marcas in Judicium reponat; Si verò à Conventu generali ad nos appellatum fuerit, sex floreni per triginta grossos deponantur. Et si Appellans coram Judice appellato succubuerit, in usum publicum Judicii, in quo erant repositi, cedant; alioquin parti restituantur.

Nec Palatini Causas ad Jus Terrestre spectantes, nisi de consensu partium, judicent, Et provocantes ad Judicium Terrestre remittant: Exceptis causis levioribus, quæ videlicet valorem decem marcarum non excedant. Hæ quidem sine strepitu judicii de simplici & plano ab eis componi possunt. In Causis autem sanguinis & facti recenti depræhensis, indilatam Justitiam ministrent, Nec partes contendentes ad componendum amicè inter se controversiam cogant, nec ulla pœnas exigant, nisi per Judicium decretas. Quarum pœnarum tertia pars Judicio Terrestri, reliquæ duæ partes Palatino loci cedant;

Palatini & Capitanei citati tam in Judicio Terrestri,
quàm

quàm Conventuum Publicorum, respondere sint obligati: Exceptis Actionibus super Bonis nostris Regalibus emergentibus. Capitanei autem juxta continentiam Privilegii Terrarum Prussiae sint Indigenae possessionati, ratione quarum possessionum si Bona terrestria fuerint, Judicio Terrestri sint subjecti.

Ut autem temerariae lites amputentur, Commissarios five Judices delegatos non deputabimus in Causis ad Judicium Terrestre spectantibus, & minus in eo jam pendentibus, nisi per Appellationem Ordinariam, de qua superius dictum est, à Sententia diffinitiva seu interlocutoria jam lata, ad Tribunal nostrum devolutae fuerint; Exceptis Causis limitum Bonorum nostrorum, Regalium, & divisione fratrum & proximorum.

Nec Judices delegatos seu Commissarios, à quibus semel appellatum est, in eadem Causa denuò deputabimus, aut Causam ad ipsos remitemus. Non enim verisimile aut honestum videtur, quòd Judex pristinam suam sententiam retractet, aut aliter postea judicet, quàm antea judicaverat.

Conventus autem publici seu generales, juxta proximam Ordinationem nostram, in Prussia quotannis bis celebrentur, Verno videlicet tempore Marienburgi ad diem Sancti Stanislai; Tempore autem Autumni in Graudentz ad diem Sancti Michaelis. In nostro tamen arbitrio erit, cum res ita postulaverit, alium locum & tempus hujusmodi Conventibus praescribere. Peculiares autem conventus per nos instituendi locum & diem ex nostro arbitrio sortientur.

Ad praedictos Generales Conventus omnes Cause tam ex Civitatibus, quàm ex Judiciis Terrestribus per

Appellationem devolvantur, & etiam sine speciali commi-
missione nostra judicentur. Unde verò, & non an-
teà, ad supremum Tribunal nostrum remittantur, parte
provocante, Cui ad prosequendam Appellationem à Ju-
dicibus legitimus terminus præfigatur, Quam Appella-
tionem si intra unius anni spacium non prosequeretur,
prior Sententia juxta Juris communis dispositionem, ut
prædictum est, in rem transeat judicatam, & executio-
ni demandetur.

Ante Conventum verò Publicum, per nos & succes-
sores nostros singulariter instituendum, in singulis Pa-
latinatibus, Culmensi videlicet, Marienburgensi & Po-
meranie, fiat Nobilitatis Conventio Particularis, Quam
secundum morem antiquum Palatini, in singulis distri-
ctibus Palatinatus sui, ad aliquem locum convenientem
literis suis convocent, ut Nuncii ad hujusmodi Conven-
tum mittendi eligantur. Qui autem vocatus non com-
paruerit, poenam duarum marcarum pendet, Cujus me-
dietas Palatino ejus loci, altera verò ærario publico pro-
veniat; exceptis dictarum Terrarum Prusie Consiliari-
is nostris, sive equestris, sive civilis sint Ordinis.

At cum frustra Sententiæ ferantur, nisi legitimæ
executioni demandentur, Volumus & irrefragabili Con-
stitutione sancimus, ut deinceps unusquisque, cujusvis
conditionis aut eminentiæ fuerit, rei judicatæ, sine o-
mni contradictione, cum effectu pareat & obsequatur;
Alioqui locorum Palatini, nullo alio mandato expecta-
to, legitimam executionem faciant, adjuncto sibi, ubi
Causæ conditio id postulaverit, Capitaneo & Nobili-
bus illius districtus, aut etiam, si necessitas exegerit,
omnibus & singulis Vasallis nostris, seu Nobilibus illius
Palati-

Palatinatus, quos ad assistendum illi sub Jurisjurandi debito, & amissione feudorum obligatos esse decernimus. Si verò majori potentia sit opus, negocium ad nos referri volumus, ut opportunis rationibus rebus provideamus.

Palatinos similiter ad hujusmodi executiones faciendas, Justitiamq; oppressis ministrandam, Jusjurandum nobis præstitum adigat, quos etiam, si remissiores fuerint, quinquaginta florenorum Hungaricalium poena, plecti volumus, Cujus mulctæ medietas parti, cui Justitia denegata est, altera verò medietas Ærario publico Terrarum Prussiae cedat.

Ubi autem quis Executioni voluerit resistere, aut jam factam violare convictus fuerit, poena banni sive proscriptionis, ac Bonorum confiscatione irremissibiliter puniatur; Ex quibus Bonis parti læsæ primùm fiat satisfactio; quod reliquum fuerit, prædicto Fisco applicetur.

Statuimus præterea, ut nullus Capitaneus, Nobilis, Civis aut quivis alius, cujuscunque conditionis existat, personis, castris, domibus aut possessionibus alicujus ullam violentiam inferre, incursiones facere, in publicis stratis insidias ponere, præsumat: Super his convictus, juxta antiquum Plebiscitum Terræ Culmensis, Capitali poena puniatur:

Et cum aliquis Nobilis decreto Publici Conventus, Judicio Palatinorum aut Terrestris capitur, quòd sub certis poenis in potestatem aut carcerem Civilem non tradatur, sed in manus Palatinorum. Si quis autem in Civitate, ubi nulla Arx est, capitur, & autoritate Conventus, Palatini aut Judicii in carcerem Civilem conjicitur, in potestate eorundem, & non Civitatis permaneat.

neat; Fidejussoria autem cautione à carcere hujusmodi liberetur, nisi Causa fuerit Criminalis.

ET ut sub poena viginti florenorum Hungaricalium, quorum medietas Palatino, altera parti læsæ cedat, absq; ulla remissione persolvenda, Nobiles & eorum subditi, authoritate seu potestate Civili, non capiantur, detineantur aut arestantur.

Nec Nobiles autoritate propria capiant aut detineant Cives vel eorum subditos, sed unusquisq; coram Judice suo ordinario conveniatur, & Justiciam requirat, nisi in Casibus recentibus & Actionibus Criminalibus, prout pax perpetua disponit, statuens, quòd delinquens in loco delicti deprehensus, & contrahens de contractu recenti in loco contractus poterit conveniri.

Præterea, ne in fluminibus Terrarum nostrarum, Prusis ab antiquo navigabilibus quibuscunq; obstacula fiant, ut tam piscibus quàm navibus & lignis liber transitus permittatur; Bonis ac Juribus nostris Regalibus & quorumcunq; Privilegiis antiquis, & præscripta consuetudine, salvis.

Nobilibus autem, qui habent Privilegium piscandi in lacubus nostris Regiis, aut testibus fide dignis probare possunt, se fuisse in possessione piscandi, aut quorum limites aut ager stagnis nostris Regiis adjacet, his quidem piscatio permitti debet, sed parvis retibus duntaxat, ad usum & mensam eorum propriam, non autem ad vendendum, Ea tamen conditione, ut retia castrensia in hyeme primos habeant tractus, & quòd tempore, quando pisces, qui Germanicè *Bressen* (Polonicè *Kliescz*) vocantur, semen aut foetum emittunt, nulli liberum sit in lacubus nostris Regiis piscari, ne hujusmodi piscium,

foetura

foetura in augmentando impediatur, Sed nolumus per hunc Articulum Tenentariis Bonorum nostrorum Regalium aliquod præjudicium generari, aut ipsis, seu quibuslibet aliis proprios lacus habentibus, vim aliquam inferri, quòminus iuribus suis & antiquis Privilegiis uti possent.

Et prætereà, ut Ecclesiastici Bona terrestria Ecclesiis ascribenda & approprianda sive incorporanda, absq; speciali consensu nostro amodò non nisi à suis Vassallis emant, ne obsequia nobis ex ipsis debita intercant; Pro se verò privatim illa emere possunt, Quæ si in vita sua non alienaverint, aut cuiquam non donaverint, ad eorum propinquos & consanguineos devolvantur.

Civibus Bona Terrestria, & Nobilibus Civilia Bona liberum sit deinceps emere, Ita tamen, quòd ad patriam onera utrinq; ferenda sint obligati, Quòd scilicet Civives, ratione Bonorum Terrestrium, omnia Nobilitatis onera, & Nobiles, ratione Civiliū Bonorum, omnia Civilia onera, æquis passibus ferant.

Nec amodò liceat rusticis feras in nemoribus venari, nec laqueos in sylvis & agris ponere, canes aut retia venatoria habere: Alioqui in potestate dominorum sit bombardas, canes, & retia hujusmodi auferre, & pro qualitate excessus mandatum prævaricantes in decem marcis Domino fundi applicandis toties quoties punire. Exceptis fossis pro Luporum captura, quas, sine tamen cujusvis præjudicio, quilibet cum consensu dominorum suorum habere potest.

Simili modo nec Palatini, Capitanei aut Nobiles, alter in alterius fundo, absq; voluntate Domini fundi, venari, nec in sylvis feras domare aut cicurare debet.

L quod

quod Klupffen vocant, sub amissione rerum, equorum & carruum.

Bombardis autem nemo omninò nec in propriis nec in alienis sylvis, sub pœna Centum florenorum Hungaricorum irremissibiliter solvendorum, amodò utatur; cujus multæ medietas nobis, altera Ærario publico Terrarum Prussiae, proveniat.

Et item, ut Palatini & Capitanei, quisq; in suo Palatinatu & Capitaneatu diligenter fines Terrarum observent, ne prædones & grassatores ingrediendo & egrediendo impunè grassentur.

Et præterea, ne rustici cum bombardis, cuspidibus, lanceis, gladiis, aut similibus armis, publicè aut privatim incedant, eaq; deferant, nisi ad venationem, aut publicam pacem tuendam, à Dominis & Potestatibus suis evocati fuerint: Scultetis etiam exceptis, quibus ob publicam functionem armatis esse liceat.

Ex quo etiam multorum querimoniis accepimus, quosdam Officialium nostrorum, præsertim Tucholienfes, prætextu Mandati prohibitorii de investitione Salis peregrini in Pologiam, innocentibus, antequam finibus Terræ appropinquent, Salem adimere, Quod quia iniquum est, sub gravi indignatione nostra prohibemus, ne de cætero cuiquam adimatur, nisi ultra fines transgresso.

Nobiles præterea districtus Schlochoviensis, instar rusticorum, ut ligna ad Arcem ducant, aut alia servitia rusticalia faciant, cogi nolumus, Sed antiquam consuetudinem servandum esse decernimus.

Cum etiam Mercatores, & præsertim peregrini sive exotici homines, in Nobilitatis ac Civitatum injuriam, pelles, frumenta, humulum, ceram, linum, & alia,
merci-

mercium genera, in villis ac pagis, clam & publice coë-
 mere, & negociationes illicitas exercere soleant, autho-
 ritate nostra Regia firmiter prohibemus, ne id de cæte-
 ro fiat, Statuentes, ut deinceps Subditi Dominorum,
 merces & res suas vendibiles in Civitates juxta veterem
 consuetudinem ducant, & in foro publico venales ex-
 hibebant; legitima tamen Dominorum suorum, cum pelli-
 bus ferarum & bestiarum sylvestrium, ratione habi-
 ta; Alioqui Emptoribus equos & currus, Venditori-
 bus autem res venditas à Præfectis nostris adimi & con-
 fiscari volumus.

Mandamus insuper, & ita omninò habere volumus,
 ut Palatini debitores decimarum aratralium, & quorum-
 vis Ecclesiasticorum proventuum Censuras contumaci-
 ter sustinentes ad hujusmodi debitorum solutionem re-
 mediis opportunis compellant, ne Ecclesiasticipro-
 ventibus suis fraudentur.

Ea itaq; omnia & singula superiùs descripta, quæ
 vel veterum Privilegiorum rationem continent, firma
 & fixa, ut priùs, vel noviter ad publicum commodum
 inventa, rata & perpetua esse volumus. Harum serie
 literarum, quibus & manum & sigillum nostrum appo-
 nere curavimus. Datum Cracoviæ feria quinta post
 festum Nativitatis Beatissimæ Virginis Mariæ proxima,
 Anno ejusdem partus Millesimo, Quingentesimo, tri-
 gesimo octavo, Regni verò nostri Anno trigesimo se-
 cundo.

SIGISMUNDUS Rex Ist.

PRIVILEGIUM
 D. SIGISMUNDI REGIS,
 DE INSTANTIIS (QVAS VOCANT)
in Judiciis Terrarum Prussia observandis.

SIGISMUNDUS Dei gratia Rex Poloniae, Magnus
 S Dux Lithvaniae, Russiae, Prussiae ac Masoviae etc.
 Dominus & Haeres, Universis & singulis, in quorum
 manus haec nostrae litterae pervenerint, planum testatumq;
 facimus, Quod cum & a Consiliariis, & a reliquis Ordini-
 bus Terrarum nostrarum Prussiae, una omnium voce,
 fuisset nobis supplicatum, ut tres tantum, non quatuor,
 esse vellemus Judiciorum Instantias, ita ut a secunda in-
 stantia recta ad Nos, non autem ad Consiliarios Terra-
 rum nostrarum Prussiae, fieret Appellatio: Nos tan-
 tum esse ea in re omnium Ordinum consensum videntes,
 atq; illud una considerantes, quod & Juris ordini ma-
 gis congruit, & cum ipsis litigantibus, tum Consiliari-
 is Terrarum nostrarum Prussiae minus est onerosum fu-
 turum, quorum illi sumptu inutili, hi vero supervaca-
 neo labore & molestia liberabuntur, si tres tantum Ju-
 dicioꝝ Instantiae observentur: Judicia Civitatum &
 Oppidorum nostrorum Prussiae in hunc ordinem redi-
 genda putavimus, ita ut praesentibus redigimus. Ma-
 // joꝝibus in Civitatibus Terrarum nostrarum Prussiae a-
 // puꝝd Judicium Scabinorum primam esse volumus Instan-
 // tiam, a quo ad Senatum, a Senatu recta ad Tribunal
 // nostrum Regium Appellationem fieri. In Minoribus
 vero

verò Civitatibus prima ut sit Instantia apud Judicium Civile, à quo, si litis æstimatio non excedat precium aut valorem quinquaginta marcarum Prutenicalium levis monetae, possit fieri Appellatio ad Capitaneos & Præfectos locorum, & ibi fiat secunda Instantia, à quibus, cui visum erit, liceat appellare ad tribunal nostrum Regium. Ubi verò valorem quinquaginta marcarum, excefferit, fiat Appellatio à Judicio Civili ad Consiliarios Terrarum nostrarum Prussiae, ut apud eos tunc secunda sit Instantia, à quibus rectà ad Regium Tribunal nostrum appelleretur.

Quod autem attinet ad Judicia Terrestria, maneat & servetur per omnia, ut est in Constitutionibus expressum.

Hunc Nos Appellationum ordinem inviolatè ab omnibus in Majoribus & Minoribus Civitatibus Terrarum nostrarum Prussiae volumus observari, & mandamus, tertiam Instantiam apud Nos & non alibi esse debere præsentibus decernentes.

Harum, quibus Sigillum nostrum est appensum, testimonio Literarum. Datum Cracoviae feria quarta in vigilia S. Matthæi Apostoli & Evangelistæ, Anno Domini Millesimo, Quingentesimo, quadragésimo secundo; Regni verò nostri Anno trigesimo sexto.

SIGISMUNDUS Rex st.

LEGATIO D. SIGISMUNDI REGIS AD

ORDINES TERRARUM PRUSSIAE,

qua perspicuum est, eosdem Ordines, licet unum sint cum Regno Corpus, diversa tamen habere Jura, & ad auxilia contra quosvis hostium impetus ferenda non esse asscriptos; Regiam quoq; Majestatem Juribus Terrarum Prussiae nihil detractum cupere. Anno DOMINI M. D. XLII.

Salute dicta & Gratia Regia in hanc sententiam Orator noster verba faciet. Deliberatum erat Sacrae Majestati Regiae, quandoquidem non sine gravi animi sui molestia toties id frustra egit, non amplius instare atque urgere, ut pro officio suo Do. Vestrae Terrarum harum Prussiae rationibus consulere, quas impediri per nonnullos intelligebat. Nam neq; personae dignitatisq; suae id esse putavit incassum ea tentari, quae tot missis nunciis, tot tam accuratis hortationibus & modò non obtestationibus obtineri haecenus non potuerunt. Cum tamen non suae privatae utilitati, sed Reipub. Terrarum istarum commodo, periculosissimis temporibus his, pro boni Regis veriq; patriae parentis officio, prospectum, voluerit, facile conjicere possunt Do. Vestrae, quandoquidem tot jam legationibus nihil aliud postulatum est per S. Majestatem Regiam à Do. Vestris, quam ut suam ipso-

am ipsorum & charissimorum pignorum, conjugumque
 suarum salutis curam suscipere, ut fortunas suas salvas
 vellent, ut tuendæ & defendendæ patriæ suæ rationem
 aliquam inirent, quo ferendum illi animo fuerit, nihil
 se tantopere instando atq; urgendo proficere potuisse;
 poterat certè offensus animus eorū curam abjicere, quos
 ipsos sui curam priores abjecisse, suæq; postulationis &
 paternæ admonitionis tam exiguam habuisse rationem,
 videbat. Sed quo est paterno erga suos animo, quaq;
 est senili prudentia, etiamsi erratum ab his graviter vi-
 debat, quos liberorum loco charos habet, non ideò ta-
 men suum ab illis animum prorsus alienandum, neq; cu-
 ram eorum posthabendam existimavit; Me ad Do. Ve-
 stras misit, ut, qui oculatus fui testis eorum, quæ proximo
 superiore Autumno ad Budam gesta sunt, qui modò
 non ipse interfui miserandæ cladi illi, quam à Turcis eo
 tempore Respub. Christiana majorem accepit, quàm ut
 fando explicari queat, verbis Majestatis ejus Do. Ve-
 stras admonerem, ut animo secum diligenter reputarent,
 quantum in periculum non modò Ungaria & Germa-
 nia, verum etiam inclytum Poloniæ Regnum & Terræ
 istæ Prusiæ universæ ex hac tanta Christiani exercitus
 strage sint adductæ. Si fuit aliquando, nunc hora est
 maximè, nos de somno surgere: Appropinquavit enim
 ille, qui tanquam Leo circumiens quærit, quem devoret.
 Nullum sibi quidem indictum à quoquam & denunci-
 atum bellum habet S. Mtās Regia, quæ experientia,
 magistra didicit, nihil esse pace utilius, cujus nomen
 dulce, res est ipsa cumprimis salutaris. Semper itaq;
 Mtās ejus à turbulentis consiliis abhorruit, neq; irritan-
 dum atq; armis laceffendum quenquam putavit, etiamsi
 laceffi-

lacefsita neq; animum neq; vires sibi deesse ostendit.,
 Christo conatus ejus adjuvante, ad vim cujusvis propul-
 sandam, Ne nunc quidem alio est animo, quinpotius
 in veteri more institutoq; suo perseverare statuit; sed ea
 videt esse tempora, quibus majora, quàm unquam an-
 teà, Regno ditionibusq; Majestatis ejus impendent peri-
 cula. Quare provocare ipsa neminem decrevit., Sed
 providendum esse nihilominus dubiis temporibus his
 cenfet, si quæ nec opinato vis alicunde major existat.,
 quemadmodum ea propelli queat. Intelligit S. Mtās
 Regia, quæ sua sit, quæ hostium potentia, suis ipsa viri-
 bus non esse fidendum prospicit, sed Christi solius gratiæ
 & misericordiæ, qui vult nihilominus, si adjuvari à se
 velimus, ut & ipsi manus admoveamus. In hoc itaq;
 spe omni & fiducia collocata, non in curribus, non in e-
 quis, sed in solo nomine Domini nostri JESU CHRISTI, per-
 suadet sibi S. Mtās Regia, si suorum omnium vires con-
 junctas habeat, etiamsi nulla adsint externa auxilia, pos-
 se se tamen, Christo Duce, quamlibet magnam hostium
 vim propulsare; Sed si solius Regni copiis id fieri posse,
 credat, metuit, ne tentare Dominum videatur. Quam-
 obrem in hoc studium toto (quod ajunt) pectore incum-
 bit, ut non modò Regni, verùm etiam omnium Terra-
 rum ditionumq; suarum vires, contra vim aliquam ma-
 jorem, conjunctas habere queat, A qua ratione cùm non
 abhorrere videatur Magnus Ducatus Lithvaniæ, qui ta-
 men ad Regnum nequaquam pertinet, quantò magis æ-
 quum est, eandem ad rem suas Do. Vestras voluntates
 inclinare, quæ etiamsi Jura habeant diversa, idem ta-
 men certè cum Regno Corpus sunt? Nihil est necesse
 repetere eadem, quæ anteà quoq; dicta sunt Do. Vestris,
 & quæ

& quæ ipsæ pro sua prudentia facile perspiciunt, quàm
 facile sit dispersos vincere, quàm difficile in unum om-
 nes congregatos. Si, quod Deus omen avertat, aliquid
 de Regno actum esset, quæ spes reliqua Terris his esse
 posset? Hoc itaq; providendum est omni ratione, ut to-
 tum Regni Corpus, si quæ vis major sit, ei se opponat,
 adjunctis etiam eorum auxiliis, qui etsi ad Regni Cor-
 pus non spectant, eidem tamen Domino subsunt. Ni-
 hil est, quòd hîc Legum & patriarum Constitutionum,
 fiat mentio, quæ cum ad utilitatem Reipub. latæ sint, ad
 interitum ejus uti eis velle rationis non est. Non hoc
 postulat Sacra Mtâs Regia, ut ad quemvis hostium im-
 petum suas Do. Vestræ cum Regno vires jungant; ni-
 hil illa de Juribus Terræ hujus detractum cupit: Sed si
 usus veniat, quod tamen prohibere Divina misericordia
 dignetur, ut potentior aliquis hostis ingruat, Tum ve-
 rò postulat Sacra Majestas Regia, ut tanquam ad com-
 mune incendium restinguendum, communibus omni-
 um viribus succurratur, Ne si de Legum literis disputare,
 quàm armis libertatem nostram tueri maluerimus, non
 modò Jura nobis nostra eripiantur, sed nos etiam ipsi u-
 nâ, & conjuges liberiq; nostri, partim vita fortunisq;
 omnibus evertamur, partim in duram servitutem capti-
 vi ducamur, Quæ omnia gratia sua & misericordia pro-
 cul à nobis Deus avertere dignetur. Admoneat Do.
 Vestras infelicis Ungariæ casus, quæ, si conjunctis om-
 nium viribus hostili potentia restitisset, nondum for-
 tassis ad hanc calamitatem pervenisset, quam sine la-
 chrymis nemo commemorare potest. Hoc unâ secum
 reputent Do. vestræ, quæ fides Regi & Domino debea-
 tur, quàm id indecorum, quàm parum honestum nobis

futurum esset, quàm à Nobilitate Virtuteq; nostra prorsus alienum, Regem & Dominum nostrum, de nobis benè merentem, de Regno, deq; fortunis suis omnibus dimicantem deserere, neq; ei periclitanti omni ope nostra adesse. Non est, quòd Do. Vestrae in id tempus consultationem hac de re rejiciant, quo armis potius, quàm consilio, opus futurum esset. Tempori providendum est, si & Regem nostrum & nos ipsos salvos esse volumus. Nam & hæc ipsa æstas, quæ instat, quid allatura sit, quis est, qui certò scire queat? Non modò Sereniss. Ro. Regi, sed & fratri ejus Imperatoriæ Majestati, graviter his temporibus fortuna est adversata, quæ non minorem, quàm ipse Serenissimus Ro. Rex, cladem accepisse certò nunciatur, qua ex re dubium non est quin creverint animi communi Christiani nominis hosti. Omnia itaq; formidat S. Mtās Regia, ac tempori prospiciendum suis esse putat. Quapropter in his ipsis Comitibus constituent jam tandem Do. Vestrae, quibus copiis adesse Regno possint, si quis hostium fiat validior impetus. Ac, ne defint bellorum nervi, certam etiam pecuniam contribuendam decernant, qua conduci miles queat, si qua id necessitas postulet.

Hæc sunt, de quibus agere me cum Do. Vestris S. Mtās Regia misit, quæ cum ejus generis sint, ut ad salutem earum tuendam, ad fortunas conservandas pertineant, etiam atq; etiam pro paterno animo suo Do. vestras hortatur S. Mtās Regia, ne usq; adeò Reipub. suæ commodorum, neve suæ ipsius & liberorum conjugumq; suarum salutis oblivisci velint, ut salubribus his monitis S. Majestatis R. obtemperandum non putent; Meminerint potius, quid Principi suo, quid Patriæ suæ debeant, atq; ad illius utilitatem consilia sua omnia dirigant.

Quoniam verò allatæ sunt non pridem literæ ad S. M^{te}m Regiam, à Sereniffima Do. Maria Hungariæ Regina, quibus postulat, ut ratio inveniatur, qua per Sereniffimum Dominum Daniæ Regem hominibus ejus ultro citroq; tutò navigare liceat, Quod nisi curatum sit, sibi necesse fore, ut aliorum Principum, ita nostris quoq; Subditis navigatione interdicere. Harum literarum exemplum ad me missum Do. vestris profero, ut posteaquam legerint, quid ea de re consilii capiendum sit, S. Majestati Regiæ significant; quò commodis harum Terrarum prospiciatur, ut libera omnibus & segura sit navigatio, etc.

Samuel Episcopus Plocen
& ViceCancell. sst.

AD D. SIGISMUNDUM REGEM ORDINUM

TERRARUM PRUSSIÆ MISSA LEGATIO, qua petierunt, ut Privilegiorum literas, progenitorum fide, virtute & sanguine partas, & ab ipsis fide & conscientia non pejore hæctenus possessas, ratas inviolatasq; conservaret; Terrarum tum temporis Præside vigilantissimo Reverendissimo Domino Tidemannò G^o Episcopo Varmien. Anno Domini M. D. XLVIII.

IN magna perturbatione Anno superiore, Sereniffime Rex, constituti S. Majestatis V. subditi Consi-

liarii Terrarum Prussiae, cum eorum Jura & Privilegia, solito acrius oppugnarentur, collato consilio cum cæteris illarum Terrarum Statibus, nos ex singulis quibusq; Ordinibus delectos ad Sereniss. Mtē V. designaverant Oratores. Quoniam verò ejusmodi videbatur esse causa, quæ Majestatis Regiæ animum perplexiorem reddere posset, si sine mediatore commodo apud ipsam ageretur, censuerunt prius Legationis nostræ rationes omnes S. Majestatis V. Filio, Regi & Domino nostro clementissimo, ad quem totius negotii pondus perventurum erat, exponendas esse.

Missi igitur in Lithvaniæ Ducatum, cuncta ad e-
jus Mtē retulimus, quæ apud S. Mtē V. agenda nobis essent, quorum omnium exempla atq; ipsam instructam Legationem cum non ignoremus ad Majestatem V. transmissam fuisse, nolumus nunc iterata illorum recensione auribus Majestatis V. duplicato tædio esse molestiores. Ne tamen fides desit relatis, ipsum Legationis autographum V. Majestati, quandocunq; jussit, exhibere parati sumus: Interim alterum ipsius exemplum, per opportunitatem coram Majestate V. recitandum, offerimus, humiliter eam precantes, dignetur hæc non certandi studio, sed supplici & syncera fide, nec cirra necessitatem proposita, in benigniorem partem interpretari, ac pio, ut solet, affectu in animum admittere.

Quoniam verò nobis & fratribus nostris plus præfidii est in naturali illa clementia & æquitate Majestatis V. quàm in contentiosa verborum & argumentorum, explicatione, ipsas Privilegiorum literas, quibus nitimur, publica fide exceptas, reponimus & prosternimus
ad pe-

ad pedes Majestatis V. cui potestas est vel conculcare, S
 illas, si id commeriti sumus, vel rata inviolataq; conser-
 vare ea, quæ solenni pactorum foedere recepta sanctè,
 ac non solum clarissimæ memoriæ CASIMIRI Regis
 parentis, sed ipsius quoq; Majestatis V. & plurimorum
 procerum, hujus Regni Senatorum, quorum nepotes
 & cognati adhuc supersunt, sigillis & sponsonibus sta-
 bilita esse, hæc, quæ hic coram Majestate V. in prospe-
 ctu jacent, clarissimè testantur. Quæ omnia proge-
 nitorum nostrorum fide, virtute & sanguine parta, cum
 à nobis posteris fide & conscientia non pejore sub Mtis
 vestræ tutela hætenus possideantur, Nos nomine dicto-
 rum Statuum ac omnium Majestatis V. subditorum, Ter-
 ras Prussiæ incolentium, tam Spiritualium quàm Secula-
 rium, tam adultorum quàm à maternis uberibus penden-
 tium, quorum omnium una libertatis agitur causa, una
 concussionis manet asperitas, ad pedes S. Majestatis
 V. humiliter provoluti, per adorandam gloriam divi-
 næ Majestatis, sub cujus conspectu acta & gesta sunt,
 hæc omnia, per Domini nostri Jesu Christi preciosum
 pro nobis effusum sanguinem redemptionis, istorum no-
 strorum foederum conscium, per venerandum nomen
 & honorem Divi CASIMIRI genitoris Majestatis V. qui
 omnium illorum fuit dux, præses & author, per ipsius
 quoq; Majestatis V. regalem hunc thronum, & sacrum
 Regni Diadema, sub cujus protectione hætenus susten-
 tati utcunq; respiramus, per deniq; altissimam illam Ma-
 jorum nostrorum fidem, qua se & salutem suam, con-
 juges & liberos, fortunas & facultates suas omnes Divo
 parenti Majestatis V. & inlyto huic Regno ultrò credi-
 derunt, Oramus & humiliter obsecramus Mtëm vestram,
 K 3 ejusq;

ejusq; pietatem ac Orbi celebrem fidem obtestamur, ne
 sinat hanc gloriosam senectutem dejici à conscia servata
 semper justiciæ erga omnes, ac à præconio illo Regalis
 constantiæ & moderationis, quo totius Orbis Monar-
 chas hæctenus antecellit, Nec permittat, nos toto spi-
 ritu & anima sibi subjectos deturbari à libertate illa,
 quam à Majestate V. & ejus Divo parente acceptam,
 hæreditariam in nos patres nostri transfuderunt, Qua
 præter commertum privari, non potest nobis vitæ &
 facultatum destitutione esse minùs acerbum.

Commoniti autem usu & experientia invictæ clemen-
 tiæ & æquitatis Majestatis Vestræ, firma sumus spe, Ma-
 jorum nostrorum fidem & merita, ac in nos propagatam
 fidelitatem apud ipsam Majestatem vestram digna haberi
 æstimatione, ac propterea nos & dictos Status sub
 gratia & protectione ejus ab hac infestatione deinceps
 fore tutos, restauratis his, quæ hæctenus ab integritate
 sunt convulsa, quod devotissimè iterum supplicamus.
 Provocabit hac benignitate Mtàs V. animos subdito-
 rum ad flagrantiora fidei & devotionis obsequia, ac sibi
 Serenissimoq; Filio suo laudem hanc conservatæ Justi-
 ciæ apud posteros indicibilem & sempiternam constitu-
 et. Non dubitamus, Serenissime Rex, Sacra Mtàs ve-
 stra dignabitur nostris his humilimis nec inhonestis,
 imò & necessariis supplicationibus gratiosam aurem
 præbere, nosq; clementer exauditos, ac sibi devotissi-
 mè commendatos, ad fratres nostros lætos nuncios re-
 mittere.

SUP.

77

SUPPLICATIO EORUNDEM LEGA- TORUM, OBLATA REGIÆ MA- *stati Die XXIII. Januarii*

Serenissime Rex, dignabitur M^{tas} Vestra in memo-
riam revocare, nos nuper nomine omnium Statuum
Terrarum Prussiae ad pedes Majestatis Vestrae provolu-
tos non aliud petiisse, quam proprium Regiæ Celsitudi-
nis officium, ut Jura & Privilegia nostra, quorum exem-
pla ad pedes Majestatis V. collocavimus, nobis integra
fide servarentur, Ea sanè Privilegia, quæ ob excellen-
tissima Majorum nostrorum merita à Serenissimis Polo-
niæ Regibus concessa, nobis posteris hæreditaria suc-
cessione sunt per manus tradita. Quæ quamvis in col-
latione Dignitatum, Officiorum & Præfecturarum no-
minumq; fuerint cum injuria nostrorum interrupta, ta-
men à Majestate Vestra Thorunii nuper fuerunt in plu-
rimorum Regni Senatorum præsentia reintegrata & in-
novata, multis subsecutis promissis Regio Sigillo & ma-
nu firmatis, de non admittendo deinceps similitum eru-
ptionum eventu. Id verò quem in modum sit nobis
conservatum (quod multo gemitu referimus) præsentium
& studia adversariorum in occupandis nostris Juribus
acerrima, sed etiam ipsos jam occupatores nobis insultan-
tes oculis cernimus. Ad quas reprimendas & tol-
lendas injurias si non moverint animum Majestatis V.
supplices preces nostræ, tam religiose obtestationes di-
vini

vini nominis ac passionis Domini nostri Jesu Christi,
 non habemus in mundo reliquum aliquid præsidii aut
 intercessionis; his nobis adversantibus, qui votorum
 nostrorum ad stipulatores meritò esse deberent. Re-
 vertimur igitur ad unicum illud remedium supplicatio-
 nis nostræ, per ipsius Dñi nostri Jesu Christi sacratissi-
 mam mortem, unicum hoc petentes, quod toties repe-
 tere coram Majestate Vestra pudor nos cohibet, ac hoc
 ipsam etiam pro nostra fidelium Consiliariorum fide
 consulentes, ut cuiq; jura sua salva maneant. Quæ
 cum sit actionum nostrarum summa, obsecramus, ne
 diutius nos Mtās vestra in hac ambiguitate sustineat, sed
 potentibus nobis respondere dignetur, volet an non vo-
 let Privilegia nostra integra nobis conservare & manu-
 tenere, simulq; nobis integra restituere, quæ contra
 Privilegia nostra sunt alienata, ac scripto aliquo hanc
 suæ voluntatis declarationem nobis attestari, ut de actis
 nostris & hujus Legationis nostræ successu fidem fratri-
 bus nostris facere liceat, ac omnibus Majestatis Vestræ
 subditis referre, quæ ipsis restet libertatis spes & condi-
 tio. Non enim, Serenissime Rex, propterea huc mis-
 si sumus, ut de Statu & Libertatibus nostris iudicio con-
 tendamus cum quoquam; minimè verò, ut eorum sube-
 amus cognitionem, quorum superioritatem non agno-
 scimus, sed quorundam ex illis adversitatem experi-
 mur. Negocium nobis cum nemine est, nisi cum S.
 Majestate V. quæ ut pacta & conventa ac toties pro-
 missa servet, divino & humano jure nobis est obligata.
 Nos partes nostras exegimus humilitatis & supplicitis
 debitæ, nec spem deponimus, quin S. Mtās V. justitiæ
 rationibus devicta, ea, quæ à nostris Privilegiis, maxi-
 me in

mè in Castrorum & Præfecturarum alienatione hactenus sunt avulsa, nobis hîc præsentibus restaurare dignabitur, ratione aliqua reperta, qua his Dominis, qui Inscriptiones novas utcunquè super his obtinuerunt, propriæ servitiis compensatio aliqua citra nostram injuriam fieri possit: Interim etiã proviso, ut Generosus Dominus à Baysen Castellanus Elbingen ob insignia merita progenitorum suorum liberè fruatur Inscriptionibus, quas super Castro Mewen à Mtē V. obtinet, ante quarum exitum deturbare illum Dominus Palatinus Plocen conatus est, de qua inconcessa licentia ex Terris Prussiae plerique exacerbati ad nos scripserunt; nec parum nos quoq; afflixit, quòd hæc, nobis hîc apud Mtē V. ad ejus vocationem præsentibus, præter spem & opinionem admittuntur. Dignetur autem Sacra Majestas V. his omnibus rebus Regia benignitate ita prospicere, ne cum mœrore & pudore ad fratres nostros reversi, majorem etiã ipsis mœrorem afferamus, Acceptura pro hoc Justitiæ merito, præter divinæ gratiæ pensationem, etiã hujus afflictæ nobisq; dolendæ valetudinis suæ optatam laxationem: A nobis verò consolatis subditis suis, quæ inde commoda sibi Serenissimoq; Filio suo proventura sint, pro sua incomparabili prudentia, ipsa æstimabit.

Ejusdem S. Mtis V.

Subditi

Legati omnium Statuum
Terrarum Prussiae unà cum
Equestris Ordinis & Civita-
cum Minorum Nunciis.

L

LITE.

80

LITERÆ D. SIGIS-
MUNDI AUGUSTI RE-

GIS, QUIBUS SE DEBITUM JUSJU-
randum præstitisse, & ita Serenissimi Parentis pro
se datam fidem liberaſſe ſignificat, & ſolem-
niter car-
vet, quòd poſt obitum Patris nemo Subditorum pare-
re debeat, niſi priùs ipſis omnia Jura & Privilegia
tam publica quàm privata, & quaſvis Literas, Li-
bertates, & Immunitates, à Majoribus ſuis donatas,
& à Sereniſſimo Parente adhuc donandas &
conſtituendas, literis ſuis confirmaverit,
& juxta continentiam & tenores ea-
rundem in debita executione
poſuerit.

SIGISMUNDUS AUGUSTUS Dei gratia Rex Polo-
nii, Magnus Dux Lithvaniæ, Ruſſiæ, Pruſſiæ, Ma-
ſoviæ, etc. Dominus & Hæres, Significamus teſtatumq;
facimus univerſis & ſingulis cujuſlibet Ordinis, Dignita-
tis atq; conditionis hominibus, Quum Conſilarii Re-
gni noſtri Poloniæ, ſingulari quadam propenſione er-
ga Sereniſſimum Parentem noſtrum Dominum Dñm SI-
GISMUNDUM ejus nominis Primum Regem Poloniæ, &
erga nos proſapiamq; noſtram univerſam adducti, An-
no abhinc ſeptimo nos Regem Poloniæ deſignarent, ei-
demq; Regno, obedientiæ & fidelitatis jurejurando nobis
dato, nos inaugurarent, recepit eis pro nobis & ſpon-
dit, &

dit, & literarum monumentis consignatis cavit idem Serenissimus Pater noster, quo volente & adjuvante hæc fieri debent, minimè teneri eos jurejurando suo, quòd nobis præstitissent, nec imperio nostro parere debere, nisi nos ipsis vicissim juraremus, Nos omnia Jura, Privilegia, libertates, literas & immunitates justas & legitimas, ejusdem Regni nostri Ecclesiasticas & Seculares, quibusvis Ordinibus & hominibus, nemine excepto, à Majoribus nostris Regibus Poloniae, præsertim autem à Divo Casimiro antiquo, Ludovico, Vladislao Proavo, Vladislao magno Patruo, Casimiro Avo, Joanne Alberto & Alexandro patruis, & Serenissimo Sigismundo Primo Patre nostro donatas, omninò ratas habituros esse, servaturos & defensuros, omniaq; iniquè ab eodem Regno abalienata atq; distracta pro viribus nostris recuperaturos, & ad unionem Regni aggregaturos, nec imminuturos fines ejusdem Regni Poloniae, sed aucturos potiùs prolaturusq; quoad poterimus, atq; id jusjurandum ut tum denique daremus, cum adultiorem ætatem attigissemus, hoc est, cum quindecimum ætatis nostræ annum egressi essemus, Verùm ea lege tamen, ut nihilominus universa ejusdem Regni Poloniae potestas, imperium & jurisdictio penes Serenissimum Parentem nostrum esset, quoad is viveret. Id verò tempus præscriptum quum advenisset, juravimus publicè in summo templo in Arce Cracoviensi, quarta die Februarii anni præsentis, verbis conceptis ad Sancta Dei Evangelia, in eam sententiam, cujus supra meminimus, & Serenissimi Parentis nostri fidem pro nobis datam liberavimus. Cæterùm ut pactis illis & conditionibus, quibus ad nos Regnum delatum est, stemus, & ne idem illud Regnum no-

strum ullis turbis atque difficultatibus involveremus; memores primorum beneficiorum, officiorumque nostrorum, atque benevolentiae singularis erga nos omnium nostrorum, Subditorum, recipimus, spondemus ac Regio nostro verbo pollicemur, Primum, omnia nos, quaecumque juravimus, omnibus Subditis nostris Incolis Regni Poloniae, cujuscumque Ordinis & conditionis fuerint, absque ulla controversia, servare, defendere, & exequi velle. Deinde, nihil nos imperii neque Jurisdictionis in eodem Regno, vivente Serenissimo Patre nostro nobis esse usurpaturos, neque coacturos quenquam invitum & recusantem voluntati jussumque nostris parere, Sed in ejusdem Serenissimi Parentis nostri potestate, quoad victurus est, omnia nosque ipsos etiam futuros esse. Postremo, post obitum etiam, qui utinam sero contingat, Serenissimi Patris nostri, neminem praedictorum Subditorum nostrorum nobis parere debere, nisi prius ipsis universis omnia Jura & Privilegia, tam Regni nostri Poloniae & ditionum ejus communia, quam privatarum personarum aut locorum quorumcumque privata, & quavis Libertates, Literas & Immunitates, a supramemoratis Majoribus nostris donatas, quaeque deinceps adhuc a Serenissimo Patre nostro, quamdiu vivet, donabuntur & constituentur, literis nostris confirmaverimus, atque juxta continentiam & tenores earundem in debita executione profuerimus. Quae omnia libenter pro viribus nostris faciemus & exequemur. Quod ut certum firmumque sit, signo nostro, quo nunc utimur, literas hasce consignavimus, & manu nostra subscripsimus. Datum Cracoviae sexta Februarii, Anno Domini Millesimo, Quingentesimo, Tricesimo septimo.

DECLA-

DECLARATIO
 JURAMENTI D. SIGIS-
 MUNDI AUGUSTI REGIS, REGNO
*Poloniae praestiti; illud ad Terras quoque Prussiae perti-
 nere, illasque cum suis Subditis in illo esse
 comprehensas.*

SIGISMUNDUS AUGUSTUS Dei gratia,
 REX Poloniae, Magnus Dux Lithvaniae, Russiae, to-
 tius Prussiae, Masoviae &c. Dominus & Haeres, Signi-
 ficamus praesentibus literis, quorum interest, universis,
 Quoniam in dubium vertitur, an Jusjurandum nostrum,
 quod Anno Millesimo, Quingentesimo, Trigesimo se-
 ptimo solenniter praestitimus, Status quoque & Subditos
 Terrarum nostrarum Prussiae comprehendat, cum ad
 Status tantum Regni Poloniae videatur adstrictum, de
 aliis Dominiis ipsi Regno incorporatis nulla mentione
 facta: Nos pro liberatione fidei Divi Parentis nostri,
 & securitate Terrarum nostrarum Prussiae, praesentibus
 declarant & interpretantur hoc nostrum Juramentum, bo-
 na fide dicimus & affirmamus, nostram intentionem,
 & mentem, tunc cum juravimus, fuisse, nec alio sensu
 a nobis intellectum esse, quam ut ipsum Juramentum
 etiam ad Terras Prussiae pertineret, ipsaeque Terrae cum
 suis Subditis in illo essent comprehensae, uti & comprae-
 hensos volumus & interpretamur. Harum testimonio
 literarum, quibus Sigillum nostrum est impressum. Da-
 tum Piotrkoviae pridie Epiphaniae Domini in Conven-
 tione

tionē Regni Generali, Anno Domini Millesimo, Quin-
gentesimo, Quadragesimo nono, Regni nostri XIX.

Samuel Episcopus Cra-
coviē & R. P. Can-
cell. ff.

Relatio Reverē in
Christo Patris Domini
Samuelis Episcopi Cra-
coviē, & Regni Polo-
niæ Cancellariū &c.


FINIS.




trin-
IX.

in
ni
ra-
lo-

BIBLIOTHECA
VNIV.  IAGELL.
CRACOVIENSIS





Biblioteka Jagiellońska



stdr0024883

